

弘

簡

錄

弘簡錄卷二百二十一

明刑部員外郎仁和弘齋邵經邦學

皇清翰林院侍講學士四世孫遠平校閱

載記 金內族一 始祖以下諸子

盆納

拔達等

歡都

子谷神謀演孫守道守貞守能

冶訶

子阿魯補骨被訛古乃孫滿查

石土門

弟廸古乃子

胡十門

合住

子布輝福壽

突合速

幹魯古

阿离補

子方

金諸宗室自始祖至康宗凡八世皆以部名完顏為氏始祖孫安帝之子謝夸保子曰盆納謝庫德孫曰拔達與歡都冶訶劾者五人共佐世祖有功推以為首時國步艱難五人者入預謀議出蒞行陣未嘗離左右勲勞最著盆納勇毅善射時同名有日惡盆納天會十五年追贈開府儀同三司拔達儀同三司明昌五

年五人同配饗世祖廟廷 又准德東里保皆加古部人申乃因醜阿皆馳滿部人富者粘沒罕完顏部人阿庫德白達皆雅達滿水完顏部勃董此七人者當攜離之際能一心竭力輔戴世祖與木甲部勃董達紀胡蘓木虎部人勝昆主保溫廸痕部人阿庫德五人又其次者當殿黑變時使人召阿軍德答曰吾不知他其死生與太師共蓋指世祖白達喜曰我心正如此烏春兵來可堅壁自守且勿與戰達紀胡蘓居琵琶里郭水烏春兵出其間終不爲變拒而不從勝昆居胡不干村烏春兵來止其兄滓不乃勃董家勝昆被圍後解去世祖殺滓不乃從勝昆請免其孥戮世祖破桓被散達主保死焉天會十五年准德申乃因阿庫德白達皆贈金紫光祿大夫東里保醜阿富者粘沒罕達紀胡蘇勝昆主保溫廸痕阿庫德皆贈銀青光祿大夫

歡都祖石魯與貽祖同時同部同名交相得嘗曰生則同川居死則同谷葬土人呼爲賢石魯而別貽祖爲舅石魯嘗佐貽祖耀武於青嶺白山又與掠蜀東水人二女長遠回幼滓賽貽祖與賢石魯各納一爲妾後皆別去至景祖時始定諸部君臣之分其子劼孫舉族來歸與孟乃兄弟俱居安山虎水北湖凱山南地名和陵歡都以獲麻產功遼拜爲詳穩孟乃欲除去之與烏春誘結幹魯緝出水居人啓讞會其家被火陰約隸人不歌束詭稱放火爲歡都胡土二人使注都謂世祖曰不歌束來告前日之火歡都等縱之可執以來世祖疑之石盧幹勸勃堇曰孟乃兄弟也豈以一二人之故與兄弟構怨乎不如與之便歡都被甲執戟起曰彼爲亂之人設取太師兄弟亦與之乎我輩決不可往必若用戰當盡力致死穆宗壯其所見正與已合

贈之以馬曰戰則乘此世祖審知其謀乃往見盃乃隔澗刺水
與之言曰所告縱火之由謹當如約宜先遣不歌束來至則殺
之馬前盃乃慚愧而去臘醅麻產之戰歡都入陣塞關左右出
入者數四烏春窩謀罕之難亦與焉時驪臘勃堇富者撻懶乃
穆宗后弟未嘗助軍世祖欲因軍還滅之遂馳馬前進歡都執
轡諫曰獨不念蒲陽溫之婦乎世祖感其言而止

譯語蒲陽溫
即漢語幼弟

也後穆宗德歡都言以撻懶女曷羅晒妻其子谷神久之幹善
幹脫以姑里甸兵來歸世祖使斜鉢勃堇往撫定不能訓齊其
人爲蒲察部故石拔石等所誘入城陷三百餘人命歡都爲都
統往治其罪盡解斜鉢所將軍擒故石拔石初耶悔水納喝部
撒八之弟曰阿注阿與人爭部族官不得直來歸穆宗辭不失
破烏春時獲其姊納爲次室撫其二甥三濱撒達至是撒達來

告阿注阿必爲亂辭不失不信殺之後果爲變竄穆宗晨出獵
糾率其人操戈入宅奪據寢門劫妻及家人等歡都奔見阿注
阿曰閨門眷屬豈足劫質徒使之驚恐耳汝故識我盍以我爲
質再三言之始從撤改辭不失使人告急於獵所穆宗先亦心
動罷獵中途逢告者日午至阿注阿要與盟欲使係案女直知
名官僚送我兄弟親屬由咸州路入遼與我軍金寯馬穆宗皆
從之歡都亦送至遼境遂執之及阿魯不太魯等七人行至黃
龍府使人盡遮黨屬惟縱其親人使去遂殺三濱并其母具報
於遼遼人流阿注阿於曷董城後因懷鄉亡歸附於係案女直
其官僚之室復爲所亂乃見殺穆宗初襲位諸父子習烈斜鉢
咸有異言歡都止之汝輩若紛爭則吾必不默然但已衆聞之
始帖然歷事四君出入四十年征伐之際遇敵則先戰廣延大

議多用其謀世祖嘗曰吾有歡都則何事不成肅宗委任冠於
近屬穆宗凡圖遼事皆專倚信康宗以父叔舊人尤加敬禮多
所補益十一年二月得疾避於米里每水薨年六十三天會十
五年追贈開府儀同三司代國公明昌五年諡曰忠敏長子谷
神次子謀演當阿注阿之難代歡都爲質後與宗峻俱侍太祖
特加眷顧宗峻嘗坐其上命移居下有勃堇三人爭千戶責曰
汝輩能如歡都父子有勞於國者乎改命謀演爲千戶三人者
皆隸焉天輔五年十二月卒贈太子少傅 谷神改名希尹常
在行陣從太祖及撒改與諸將戰比有功又命因契丹舊制撰
本國字備制度依倣漢人楷書合本國語天輔三年成太祖大
悅命頒行之賜馬匹襲衣後熙宗亦製女直字相與並行希尹
所撰謂之女直大字熙宗所撰謂之小字與廼古乃斐室余賄

襲遼人廸六和尚雅里斯棄中京走降其旁近人民而還吳人落虎來降從使招其父西節度使訛里剌以本部降宗翰襲遼帝於五院司以爲前驅所將纔八騎與戰一日三敗之降人麻哲言遼主在漠委輜重將奔西京追至乙室部不及而還宗翰入朝以權西南西北兩路都統夏國與契室書責諸帥棄盟軍入其境多掠取者希尹奏盟不可信上令酌宜行之果與大石合謀取山西諸郡嚴爲禦備不可不察大舉伐宋任元帥右監軍執二主以歸賜鐵券除常赦不原之罪餘釋不問復從宗翰追康王於楊州入朝請立熙宗爲儲嗣卽位拜左丞相兼侍中加開府儀同三司有大政皆身先執咎天眷元年罷爲興中尹二年復相封陳王與誅宗磐宗雋時熙宗未有皇子嫉希尹者譖以竊議神器遂賜死并殺其子昭武大將軍同修國史把答

符寶郎漫帶及右丞相蕭慶皇統三年上知實無他心死非其罪乃贈儀同三司邢國公以禮改葬慶銀青光祿大夫天德三年追封豫王正隆例降金源郡王大定十五年諡貞憲三孫守道本名習尼列初擢應奉翰林文字皇統九年授盧龍軍節度同知歷獻邢濟薊四州刺史世宗幸中都過薊父老遮道請留再任平章移刺元宜舉以自代召遷昭毅大將軍左諫議大夫論內族晏以恩舊拜左丞相陛下初卽位天下略定邊警未息方大有爲之時恐晏非其材必欲親愛莫若厚與之祿俾勿事事乃授以太尉致仕又因錄扈從將士之勞欲行賞賚而帑藏空竭議貸民財勸上寧出宮中所有無取於民自人罹虐政方喜更生今仁恩未及而徵斂遽出如羣望何詔從其言契丹叛猛安謀克在遼東者或附從之朝議欲徙於內地極陳不可

又言右副元帥謀衍將兵討賊不力代以僕散忠義紇石烈志
寧東方以平大定二年宮中十六位火方事完茸時已入夏頗
妨民力因諫而罷未幾改太子詹事兼右諫議大夫馳驛規畫
山東兩路軍糧及賑民饑乃籍大姓戶口限以歲儲使盡輸其
贏入官復給其直以是軍民皆足拜參知政事兼太子少保懇
辭諭以乃祖勲在王室朕亦悉卿忠謹以是擢用無爲多讓時
契丹餘黨尙多未附臨潢秦州民擾不安詔令佩金符往安撫
之給羣牧馬千疋以備軍用因招致契丹骨迭薛合等內附民
以寧息進尙書左丞兼太子少師嘗從獵近郊有虎傷獵夫帝
欲親射之叩馬極諫而止俄拜平章政事遷右丞相監修國史
授世襲謀克熙宗實錄告成帝稱爲直筆雖祖谷神行事有未
當者尙不爲隱尋請避賢路不許進拜太尉尙書令改左丞相

諭以此位不可虛曠須用老成人卿宜悉此自秉政以來效竭忠勤帝甚嘉之未幾上語宰臣守道論事上務從寬犯罪罷職者多欲復用若慙其首惡後來知畏罪而復用何以示戒時引年求退以未得代者優詔難從二十五年兼太子太師特錄其子珪襲謀克充符寶祇候有詔原王習騎鞠諫以哀制中未可帝曰此習武備耳自爲之則不可從朕之命庸何傷乎然亦不可數也明年致仕特賜宴慶春殿錫與甚厚令珪侍行次子璋賜進士第明昌四年卒年七十四上震悼遣其弟點檢司判官蒲帶致祭賻銀絹重綵太常議諡簡憲上重其能全終始改諡簡靖 守貞本名左賢貞元二年襲祖謀克大定初充符寶祇候授通進除彰德軍節度副使遷北京留守移上京坐娶安置契丹戶民女杖責除名二十五年起爲西京并中都左警巡使

歷大興府治中同知改西京留守同知臺臣奏其治有善狀材
能勝其兄世宗語章宗可用卽位名爲刑部尙書兼右諫議大
夫尋爲賀宋生日使還拜參知政事時上新政銳意於治嘗問
洪宣帝綜核名實之道因誦樞機周密品式詳備以對上曰行
之果何始答曰在陛下厲精無倦耳久之進尙書左丞授上京
世襲謀克明昌三年夏旱表乞解職詔以卿達機務朕所親倚
不須引咎惟思助理懇辭命參政夾谷衡諭旨卿早登廳仕才
川聲績朕所素知擢任政府於今數載毗贊實多今特授卿知
東平府素號雄藩兼比年饑歉正賴經畫其往綏撫仍賜金幣
廐馬以寵其行他日上問宰臣右丞劉瑋對曰以彼之才治一
路誠爲有餘但方今人材無出其右淹留於外誠可惜也尋改
西京留守四年召拜平章政事封蕭國公上御後閣諭以乃祖

佐命積有勲勞特加委用比者行事多太過門下少慎擇復與
丞相不協自今勉盡乃心與丞相議事宜相和諧因賜玉帶併
與御史蒲刺都所彈宴賜北部有取受事不報者朕度卿必不
爾故以示卿舊制監察御史凡八員漢人四員皆進士而女直
四員文資右職參注上從其奏此乃清要之職流品自異始一
體純用進士及奏節用省費之道並嘉納焉上一日問司吏移
轉事對曰今吏權重而積弊深移轉爲便又因歎乏才言今國
家選舉之法惟女直漢人進士得人居多此舉更宜增取其諸
司局承應人舊無出身大定後纔許叙用經童科古不常設本
朝皇統間取及五十人因爲常選天德間以爲無補罷之陛下
卽位放及百數誠恐積久不勝銓擬宜稍裁減以清流品又議
以鄭王允蹈等家產均給諸王恩命已出不爲大害如董壽罪

人特恩釋之已爲幸矣不宜更加爵賞以爲宮籙監都管勾土
是其言自明昌初北邊屢有警或請出兵擊之上意方南顧塞
河不可復用兵於北奏言彼屢突軼吾圍今一懲之後當不復
來因論及守禦之法惟有皇統以前故事捨此無法爾素以讀
書通法律明習國朝故事金自有國七十年禮樂刑政因遼宋
舊制雜亂無章悉賴更定脩正爲一代法其儀式條約多所裁
訂故明昌之治號稱清明又喜推轂善類接引後進朝廷正人
多出門下帝不悅右諫議賈守謙拾遺路鐸救鎬王允中官過
切直命治其罪守貞持不決疑其有黨乃出知濟南府仍補前
舉守貞者董師中路鐸等於外言其固有才力然太邀權譽方
之貞儒則未也以彼之才而能平心守正朝廷豈可少離俄以
在政府日嘗與近侍竊語宮掖事妄稱奏下命有司鞠問欵伏

奪官解職承安元年降授河中防禦使五年改部羅火扎石合
節度使久之遷知都府事時南鄆川兵山東重地須得大臣安
撫復移知濟南卒上悼惜之敕有司致祭賻贈禮物諡曰肅爲
人剛直明亮凡朝廷論議皆傳經以對上嘗與泛論人材概述
其心術行事臧否無少隱胥持國輩忌之竟以直罷後趙秉文
上書言願陛下進君子退小人上問謂誰對曰君子故相完顏
守貞小人今參政胥持國其爲天下推重如此 守能本名胡
刺累官商州刺史正隆末宋人陷商州被執大定五年因完顏
仲請和誓書遂與新息縣令完顏按辰俱歸至京入見詔給舊
官之俸十九年任西北路招討使在任貪墨自恣時詔徙窩幹
徐黨於臨潢泰州輒受重賂不遣又受賕補養也蕃部通事發
覺上因責守道爾之親弟何不先訓戒之併責監察專任糾彈

未嘗舉劾杖決除名

冶訶系出景祖居神隱水爲完顏部勃堇與同部把里安國二
勃堇幹泯水蒲察部胡都化斡都二勃堇統八門水溫廸痕部
活里蓋勃堇俱來歸金國自此益大肅宗拒桓赧再失利世祖
命與以本部謀克兵助之天會十五年贈銀青光祿大夫明昌
五年加特進諡忠濟 子阿魯補骨赧訛古乃散答阿魯補魁
偉多智略勇於戰鬪未冠從軍下咸州東京遼人來取海州從
勃堇麻吉往援道遇重敵力戰斬首千級從幹魯古攻豪懿州
以十餘騎破敵七百命徇北地招降營帳并民戶數千時已下
西京闔母攻應州未下退營於州北夜遣率兵伺敵動靜道遇
城中出兵三千來襲斬首百餘獲馬六十後又引千兵擊遼衆
三萬於馬邑之境斬其將於陣天會初宗望討張覺遣與阿里

帶迎擊應州援兵斬馘數千而還復從其兄虞剗率兵三千攻
 乾州在道病卒代領其衆降乾州軍及營帳三十獲印四十與
 僕廸攻下義州宗望與郭藥師戰於白河命以二謀克兵先登
 奮戰賞賚特異至汴破淮南援兵斬其二將大軍退次孟陽姚
 平仲來襲阿魯補適當其中力戰敗之還至河間大名開德合
 兵十餘萬來爭卽夜發輕兵詰旦至衛縣遇敵斬首數千級餘
 皆潰去大兵次邢州漳沱橋已焚先以偏師營之宗望比至見
 橋已成大喜賞以眞定庫物論功遷長勝軍千戶再從伐宋破
 井陘下樂城自大名濟河屯於洺州之境時康王留相州出大
 名府兵來攻我營乘夜潛引二百騎出敵後反擊敗之居數日
 敵復來乘蘇統制兵先至未集亟引三百騎出戰大敗其衆殺
 蘇統制大軍旣克汴京從捷頓攻恩州時洺州已下復叛會阿

魯補引兵先至城下敗城中兵執其守佐遂與蒲解歡取信德
軍又以步兵五千從宗弼取開德大名境內多盜命留屯其地
賊犯莘縣聞其至卽潰去晝夜追襲及於館陶皆俘以歸復從
宗弼襲康王渡淮以兵四千留和州總督江淮戍將討未附郡
縣遂攻下太平聚其城以偏師討廬州敗其騎六千擒三校明
日復破敵二萬於慎縣斬首五百張朶合步騎數萬圍城阿魯
補兵止二千潰圍力戰竟敗之追殺四十里獲馬三百而還再
攻廬州騎兵五百出戰敗之斬其二校師還與廸古不敗敵萬
衆於拓臯宗弼趨陝西道聞大名復叛遣往經略獨與譯者至
城下招降之悉收民間兵器送官吏民按堵如故擢爲大名開
德路都統齊國建又屯兵汴城外及廢日復先入城備變除爲
歸德尹割河南與宋入爲燕京內省使復河南命先濟河撫定

諸郡再尹歸德爲河南路都統宋將岳飛劉光世等兵犯歸德連擊敗之復取亳宿等州河南平論功爲最皇統五年拜行臺參知政事元帥右監軍改婆連路統軍至歸德軍節度使海陵左軍中營惡之發其在汴取官舍材木構私第於恩州遂論死人皆惜之年五十五本以將家子屢從征伐立功歷官有惠愛得民心大定三年贈儀同三司詔以其子爲右衛將軍襲猛安兼合扎謀克賜銀絹重綵 骨釵善騎射有材幹從討桓赧烏春留可皆有功復從太祖力戰寧江州出河店破遼親軍皆受賞賚襲其父謀克伐宋之役合以右翼軍佐銀术可守太原四戰汾州岡柏榆次嵐寇潞兵來援者皆破之大軍回汴復引萬戶軍敗其援兵寇潞等州仍叛又引兵取之并收撫保德火山而還後領軍鎮夏遯凡十二年天會八年授世襲猛安天眷初

爲天德軍節度使致仕累遷開府儀同三司卒年八十五子喜哥襲加宣武將軍 訛古乃姿質魁偉年十四隸宗翰軍中善馳驛日能千里常領兵行前爲偵候大軍襲遼主有北部勇者同瓜來援臨陣擒之復引甲騎六十追獲遼招討徒山并公主牙不里以獻及伐宋屢遣將命以行天會八年從宗翰在燕間余睹反黎明馳往日未曉至天德皇統元年以功授寧遠大將軍豪刺唐古部節度使五年授千戶六年遷西北路招討使九年爲天德尹西南路招討使天德二年召見四年遷臨洮尹加金紫光祿大夫卒於官年五十三 散答子蒲查自上京樞堅河徙屯天德初爲元帥府扎也使按四方事能得其實號爲稱職皇統間除開遠軍節度同知斥候嚴整邊境無事正隆初爲中都路兵馬判官捕得京畿大盜四十餘人百姓獲安改安化

軍節度副使大定二年領行軍萬戶充邳州刺史知軍事領本州萬戶管所屯九猛安軍昌武軍節度使山東副都統撒改南征以行元帥府副統事入爲太子少詹事再遷開遠軍節度使襲伯父骨朮猛安歷婆連路兵馬都總管西北路招討使卒爲人性廉潔忠直臨事能斷凡被任使無不稱云

石土門漢字作神徒門始祖弟保活里五世孫世居耶懶路爲完顏部長雖同宗屬久不通問景祖時父直葛海使部人逸孫來請復通宗系留之歲餘厚其餽廩善遇之及還贈以幣帛結其厚意久之耶懶歲饑景祖助之馬牛糴費使世祖往致會有疾石土門日夕相顧不離左右疾愈握手爲別約他日無相忘與位交好益深隣部不悅遂合兵攻之石土門使弟阿斯憐率二百人南下拒敵敵兵千人已出其東據高泉石土門將五千

人迎擊射中敵將幹里本勇士之馬幹里本反射中石土門腹
石土門拔箭戰愈力阿斯蕙遂與敢勇七人殺幹里本諸部兵
皆敗石土門因招諭諸部使附於世祖世祖嘉之後伐烏春鈍
恩秋庫德等皆以所部從戰有功阿斯蕙卒終喪大會其族
太祖率官屬往焉就訪以伐遼之議方祭有飛鳥自東而西太
祖射之矢貫左翼而墜石土門持前稱處以爲吉兆卽以金版
獻之後以本部兵從擊高麗及伐遼功尤多王師攻下西京賜
以金牌其子蟬蠢從行上語之曰吾妃之妹白散者在遼俟其
獲當以爲汝婦竟如其言復以西征諸將皆從率善射者三百
來衛京師遇太宗居守喜其至親出迎勞繼聞黃龍府叛與宗
輔討平之賜奴婢五百口師還賞賚良渥未幾卒年六十一爲
人體貌魁偉勇敢善戰質直孝友盟記赫地臨事果斷正隆二

年封金源郡王子習夫思敬弟廸古乃名忠字阿思魁太視
器重之與宗翰宗幹希尹相從過其家馮眉而語曰此來非徒
然將有謀於汝爲我決之廸名爲大圖其實空虛可取主驕士
怯戰陣無勇吾欲舉兵仗義而西君以爲如何廸古乃勸曰以
公英武士衆樂爲之用遼帝荒於畋獵政令無常特易與耳太
祖然之明年使婆盧火來徵兵廸古乃以兵會收國元年與銀
木哥守達魯古路二年與幹魯蒲察會幹魯古討高永昌破其
兵東京降又敗耶律捏里於蒺藜山拔顯州乾惠等州降天輔
二年與婁室俱入見上駐軍草澤責以遼主近在中京而敢輒
來各杖之命取奉聖州破其兵五千於鷄鳴山降其城上入燕
京命出德勝口以代石土門爲耶懶路都勃董復因耶懶地薄
斥鹵遷其部於蘇濱水仍益以實勒之山熙宗卽位進太子

太師十四年加保大軍節度使同平章事薨天德二年配饗太祖廟廷大定二年追封金源郡王 習失康宗時從幹賽破高麗軍又從太祖攻寧江州摧鋒力戰授猛安從斜也克中京襲遼主於鴛鴦濼略定山敗夏將李良輔兵與婁室俱獲遼帝於余睹谷伐宋與銀朮可圍守太原明年合敗宋兵三千於襄垣遇伏兵二千又敗之遂下潞城西京兵來拒戰逆擊復敗乃降至汴宗幹以懷孟北阻太行南瀕河控制險要使統十二猛安軍鎮撫之至則殄平寇盜招集流亡四境以安天會五年薨熙宗時贈特進大定間諡威敏十五年與斜也撒改宗幹宗翰宗望宗弼習不失幹魯希尹婁室宗雄閭母銀朮可阿离合懣完顏忠蒲家奴撒离喝劉彥宗幹魯古韓企先并習失凡二十一人共圖像衍慶宮後海陵罷諸路萬戶置蘇濱路節度使世宗

時近臣奏改蘇濱爲耶懶節度使上以蘇濱耶懶二水相距千里不必改石土門親管猛安子孫襲封者可改爲耶懶猛安以示不忘其初 思敬本名撒改體貌雄偉美鬚純直有林幹年十一從其父謁見太祖於納隣淀時方獵從射黃羊獲之賜以從馬後從習失攻宋太原與完顏活女涉渡河下洛陽圍汴皆有功師還隸宗幹麾下太宗幸東京溫湯命權設衛押卒兵人從行復領謀克從征木虎麟有功天眷二年遷顯武將軍熙宗捕魚混同江網索絕宗敏入江手引沉於水中思敬躍入水引宗敏出熙宗稱歎厚賞齊之擢右衛將軍襲萬戶誅克七年入爲工部尙書改殿前都點檢無何轉吏部尙書天德初爲報諭宋國使舊例請觀錢塘江湖謝曰我國東有巨海江水亦有大於錢塘者竟不往使還拜尙書右丞罷爲真定尹封河內郡

王徙封鉅鹿母憂起復改益都尹正隆二年例奪王爵爲慶陽
尹大定二年授西南路招討使封濟國公兼天德軍節度使俄
爲北路都統佩金牌一銀牌二以西北路招討唐括李古底副
之詔李古底曰爾兵少思敬未至不得先戰僕散忠義敗窩幹
於陷泉詔思敬還新馬三千備追襲窩幹入於奚中思敬以舊
領軍入奚地張哥宅會大軍討之敗偽節度特末也獲二百餘
人賊降將稍合住與其黨神獨幹執窩幹并其母徐並妻子弟
姪家屬及金銀牌印詣思敬降獻俘京師論功賜金銀鷹馬拜
右副元帥經畧山東初猛安謀克屯田山東各隨所受地主散
處州縣世宗不欲猛安謀克與民雜處欲使相聚以居遣戶部
郎中完顏讓往元帥府議之思敬與山東路總管徒單克寧議
曰大軍方進伐宋宜以家屬權寓州縣量留軍衆以爲餉禦俟

邊事寧息。猛安謀克各使聚居。則軍民俱便。還奏上從之。其後遂以猛安謀克自爲保聚。其田土與民田犬牙相入者。互易之。久之召還拜平章政事。先是省并猛安謀克及海陵時無功授猛克者。皆罷之。失職者甚衆。思敬請量才用之。上從其請。尋拜樞密使。上疏論五事。其一女直人可依漢人以文理選試。其二契丹人可分隸女直猛安。其三監掾官可罷去。其四與猛安同勾當副千戶官亦可罷。其五親王府官屬以文資官擬注。教以女直語言文字。上皆從之。其後女直人試進士夾谷衡尼。麗古鑑徒單鑑完顏匡輩皆由此致宰相。實思敬啓之也。久之上謂思敬曰。朕欲修熙宗實錄。卿嘗爲侍從。必能記其事跡。對曰。熙宗時內外皆得人。風雨時年穀豐。盜賊息。百姓安。此其大概也。何必餘事。上大悅。世宗喜立事故。其微諫如此。大定十三年薨。

上輟朝臨喪哭之慟曰舊臣也賻贈加厚葬禮悉從官給孫吾侃木特大定二十四年除明威將軍授速濱路寶鄰山猛安

胡十門者曷蘓館人也父撻不野事遼爲大尉胡十門善漢語通契丹大小字勇而善戰高永昌據東京招曷蘓館人爭欲歸之胡十門不肯招其族人謀曰吾遠祖兄弟三人同出高麗今大聖皇帝之祖入女直吾祖阿古迺留高麗自高麗歸于遼吾與皇帝皆三祖之後吾豈能爲永昌臣哉於是率其部族詣撒改烏蠢降營于馳回山之下永昌攻之胡十門力戰不能敵奔于撒改及攻開州胡十門以糧餉給軍後攻保州遼將以舟師遁胡十門邀擊敗之降其士卒賞賜甚厚以爲曷蘓館七部孛董給銀牌一木牌三天輔二年卒贈監門衛上將軍再贈驃騎衛上將軍子鉤空啓從攻顯州領四謀克軍破漁梁務功最以

其父所管十部爲曷蘓館都亭董時有合住者亦自稱阿古廼苗裔阿古廼始祖見也

合住曷速館慈里海水人仕遼領辰復二州漢人渤海子蒲速越襲父職再遷靜江中正軍節度使佩金牌爲曷速館女直部長子余里也與胡十門同時歸朝屢以糧餉助伐高永昌及高麗新羅後從宗望伐宋以功遷真定府路安撫使兼曹州防禦使佩金牌授苾里海水世襲猛安長子布輝識女真契丹漢字善騎射年十八宗弼遷爲北也從阿里蒲盧渾追宋康王于明州睿宗聞其才召置麾下從經畧山東河北陝西襲其父猛安授昭勇大將軍海陵伐宋以木猛安兵從半道與南征萬戶完顏福壽等俱亡歸謁世宗于遼陽世宗卽位除同知曷蘓館節度使事刑部侍郎糾哥爲都統命布輝副之坐擅署置官吏私

用宮中財物削兩階解職未浹旬世宗獻享山陵兵部尚書可
喜昭毅大將軍幹論中都同知完顏璋等謀反欲因上謁山陵
舉事幹論與布輝親舊與之謀議事具可喜傳既知事不可成
乃與可喜璋執幹論等上變可喜不肯以始謀誅首遂并誅之
而賞布輝璋除布輝涪州防禦使累遷順天軍節度使致仕卒
年六十七 福壽初襲父合住職授定遠大將軍累加金吾衛
上將軍海陵省併猛安謀克遂停封正隆末海陵伐宋福壽領
婁室臺答鵠二猛安由山東道進至泰安旣受甲福壽乃誘將
校北還高忠建盧萬家奴等亦各率衆萬餘歸東京欲共立世
宗至遼口世宗遣徒單思忠府吏張謀魯瓦等來迎察其去就
思忠等以數騎馳入軍中間將軍何爲至此福壽等言海陵失
道不能保天下國公乃太祖皇帝親孫我輩欲推戴爲主以此

來耳諸軍皆東向拜呼萬歲爲書以授思忠於是督諸軍渡遼水徑至東京城下輸軍士振甲入衛宮城殺高存福等明日與諸將及東京吏民勸進世宗卽位以福壽爲元帥右監軍賜銀幣御馬未幾從完顏謀衍討白彥敬紇石烈志寧于北京又命將兵進討高幹俘獲生口萬計名還授興平軍節度使復其世襲猛安尋領濟州路諸軍事大定三年卒

突合速宗室子挈罕塞人初隸萬戶石奴家奴麾下嘗領偏師破雲中諸山寇盜宗望攻平州遣突合速討應州賊平之及伐宋在宗翰軍以八謀克破石嶺關屯兵數萬進取文水縣後從諸帥列屯汾州之境宋河東軍帥郝仲連張恩正陝西軍帥張關索及其統制馬忠合兵數萬來援皆敗之宗翰南伐至潞還太原猶未下卽留完顏銀朮可總督諸軍經畧其地會宋援兵

大至突合速從馬五沃魯破宋兵四千于文木宋將黃廸等以
兵三十萬柵于縣之西山復與耿守忠合兵九千擊之殺八萬
餘人獲馬及貲糧甚衆宋制置使姚古率兵至隆州谷突合速
與拔离速以步騎萬餘禦之种師中兵十萬據榆次銀木可乃
召突合速使中分其兵而還與活女等合兵八千擊之斬師中
于殺熊嶺宋將張灝以兵十萬營于文木近郊復與拔离速擊
破之潞州復叛宋兵號十七萬皆被突合速拔离速皆被圍突
合速麾軍士下馬力戰遂潰圍而出及再舉伐宋宗翰命婁室
率軍先趨汴婁室至澤州突合速沃魯以五百騎爲前驅往招
河陽先據黃河津宋兵萬餘背水陣進擊敗之皆擠于水遂降
河陽汴軍平諸將西趨陝津略定河東郡縣突合速取憲州遇
其援軍擊敗之生禽其將李董濃瑰米魯等攻保德未下突合

連進兵助擊梯衝竝進遂克其城半董烏谷攻石州屢敗亡其三將軍士歿者數百人突合速力戰破之六年宗輔駐師鄧州突合速西取均房遂下其城攻唐蔡陳州及潁昌府皆克之天眷初除彰德軍節度使爲元帥左監軍後改濟南尹天德間封定國公授世襲千戶卒七十二正隆二年贈應國公

幹魯古世爲勃董伐遼使與阿魯論降幹忽忽賽兩路係遼女直戰敗遼兵殺節度使撻不也酷輩嶺阿魯臺罕等十四大孃皆降復與婁室擊遼都統實婁於咸州斬之克其城陁滿忽吐以所部降隣部戶七千亦來歸又與遼將喝補戰破其軍數萬太祖嘉之以爲咸州軍帥佐幹魯伐高末昌時胡突古叛入於遼居東京南索之以歸以便宜署爲千戶其無功散都魯訛魯補亦除以官而無罪謀克斛拔魯黃哥達及保等咸解其職太

祖盡復之罷胡突古等時幹魯古軍中闕馬在官者匿於私家
命檢括之遼耶律捏里來伐廸古乃命以咸州兵合婁室婆廬
火往擊捏里遣書請和答以阿疎叛亡索而不獲至於交兵及
行人賽刺亦不遣還若歸此二人和好之議方敢奏聞捏里復
書降去人痕孛等見還則當送阿疎等上以痕孛乃交兵後來
降阿疎則平日以罪亡去其事特異乃詔捏里令此月十三日
送阿疎至顯州各遣重臣議疆場事捏里軍蒞黎山幹魯古以
兵萬人戍東京太祖使廸古乃婁室益以兵萬人使傳詔諸將
曰遼主失道肆命徂征惟爾將士當體朕意拒命者討之服者
撫安之母食俘掠母肆殺戮誠欲請和當廢昏主立賢者副朕
弔伐之意然後議約可定否當盡并爾國其審圖之幹魯古等
攻顯州知東京事完顏幹論以兵來會先渡遼水得降戶千餘

遂薄顯州郭藥師乘夜來襲幹論擊走之幹魯古等遂與捏里
等戰於羨黎山遼兵大敗追北至阿里真波獲佛頂家屬進圍
顯州攻城西南軍士神篤先入燒其佛寺煙焰撲人守陴者不
能立諸軍乘之遂拔顯州降乾懿豪徹成川惠等州改乾州爲
閭陽縣遼諸陵在焉徙成川州人居同銀二州捏里再書請和
承前詔答之駐軍顯州聽命上賜幹魯古等馬十匹詔以汝等
力摧大敵攻下諸城朕甚嘉之遼主未獲人心易搖不可恃勝
失傳在咸州久多立功亦頗自恣及是劫里保雙古等告其不
法事言遼主在中京不追襲咸州糧草奏數不以實顯州所獲
生口財畜多與窩論等自取鞠問引伏詔降爲謀克代以宗室
子開哥爲咸州路都統使擇顯州降附之民才可幹事者授之
謀克其豪右誠心歸附者擬爲猛安錄其姓名以聞飢貧之民

官駁給之天輔六年以討賊于牛心山道病卒天眷中贈特進
配享太祖廟庭諡莊翼

阿魯補系出景祖嬖從征伐滅遼舉宋皆有功天會九年宗輔
經畧陝西以爲左翼都統與右翼都統宗弼撫定鞏洮河西寧
蘭廓等州軍來賓定遠和政甘峪寧洮安隴等城寨及鎮堡蕃
漢營部四十餘處漢官軍民蕃部酋長甚衆於是涇源熙河兩
路皆平詔以兄猛安沙魯質親管餘戶以爲世襲謀克天會十
二年除元帥右都監十五年遷左監軍天眷三年從宗弼復河
南遷左副元帥皇統三年封譚國公六年爲行臺左丞相踰月
薨大定間大褒功臣重定行慶宮圖像有所未盡始於歡都石
上門渾黜謾都訶石古乃蒲查斜卯阿里拔魯速蒲察石家奴
完顏蒙适活女突合速婆盧火烏延蒲盧渾阿魯補烏林答泰

欲完顏烏也大臭赤蓋暉耶律馬五韓常終于阿窩補共二十
二人咸著勲焉。子方累官京兆少尹遷陝西路統軍都監在
職無功專事財賄不恤軍旅大定三年遷元帥右都監轉左監
軍改順天軍節度使除西南路招討使佐以兵部郎中高通爲
招討都監詔通曰卿到天德母以其官長曲從之務簡閱沿邊
士卒毋用孱弱之人及僕隸代役女直素風凡酒食會聚以騎
射爲樂今則弈碁雙陸宜悉禁止令習騎射從其居處之便亦
不可招集擾害久之方坐強買部人馬降耀州刺史通亦坐賊
除名方後遷橫海軍節度使入爲同簽大宗正簽書樞密院事
襲父謀克

弘簡錄卷二百二十二

明刑部員外郎仁和弘齋邵經邦學

皇清翰林院侍講學士四世孫遠平校閱

載記 金內族二 景祖以下諸子

劾者 子撒改孫宗魯

幹魯

劾孫 子昱

麻頗 子孫沒都本

阿里合懋 子晏孫宗道

漫都訶

烏古出 子習不失冒不

奔觀 子宗浩

景祖九子長劾者與德帝子輩魯之孫胡率之子劾者同名前

劾者事語見帝紀天會八年追封特進此劾者性柔和國族當

異居命與世祖同邸不令治兵專治家務早卒追封韓國公弟

頗速刺納其妻加古氏 子撒改以父長不得立命為國相能

馴服諸部訟獄咸得其情穆宗自將誅鋤強梗不服已者使撒

改取馬紀嶺道攻阿疎杓期同會阿疎城下行次阿不塞水烏
延部斜勒勃董來謁說撒改曰聞國相與太師爲深入必取之
計宜先撫定潞螽星顯之路離其黨附奪其民人然後合軍未
晚撒改從之攻下鈍恩城鈍恩在南阿疎在北與初議不合穆
宗頗不然之及遼使來止勿攻阿疎然後以取鈍恩城爲功用
爲都統與太祖攻破留可城誅其渠帥取孛累貲產而還塢塔
已脫身在外其城亦撒守備而降康宗沒令分治諸部人民撒
改統來流水以南太祖統匹脫水以北明年甲午啓太祖用兵
伐遼自以近屬身任大計戰于界外獲謝十賜以所乘馬使告
克撒改及將士驩呼曰義兵始至遼界一戰而勝滅遼必自此
始遣子粘罕及希尹來賀捷因勸進太祖未從十二月復率諸
將勸進太祖卽位與羣臣前跪奏事上起泣止之今日成功皆

諸君協輔之力吾雖處大位未易改舊俗也撤改等感激拜謝
時上嘗赴諸族宴集荅拜如賓主天輔後始正君臣之禮拜國
論勃極烈加國論胡魯勃極烈五年薨太祖往吊乘白馬勞額
哭之慟及葬復親臨則以所御馬爲人敦厚多智長于用人家
居純儉好稼穡每以宗臣爲內外倚重不以戰多爲其功天會
十五年追封燕國王正隆例降陳國公大定三年改贈金源郡
王配饗太祖廟庭諡忠毅子宗翰宗憲 宗翰本名粘沒喝漢
語訛爲粘罕年十七軍中服其勇前後議論多與太祖意合天
輔五年四月從擊遼都統耶律訛里朶以爲右軍大勝于達魯
古城奏遼主失德中外離心我朝興師大業既定而根本弗除
後必爲患今乘其寡可襲取之天時人事不可失也太祖然之
卽命諸路戒備軍事五月戊戌射柳宴羣臣親酌酒以飲曰今

議西征謀元帥宗室中雖有長者無以易之汝當治兵以俟師期卽解御衣以賜拜爲移資勃極烈使西襲遼帝不果行十一月上言諸軍久駐人思自奮馬亦壯健宜乘此時進取中京羣臣言時方大寒太祖不聽竟用其策旣克中京令率偏師趨北安州與婁室徒單綽里合兵大敗奚王霞末北安遂降駐軍遣希尹經略近地獲遼護衛耶律習泥烈廼知遼主獵于鶻鶻深西北西南兩路兵馬皆羸弱不可用使梟盪溫都移剌保報都統杲遼主窮迫猶事畋獵不恤危亡兼自殺其子臣民失望衆益離心攻取之策幸速見論杲使奔睹來報頃奉詔旨不令便趨山西當審詳徐議時已整衆伺候兵期及奔睹至恐失機會決策進兵使移剌保復往報初受命許便宜從事遼人可取其勢已見一失機會後難圖矣今以精兵六千出瓢嶺以襲遼主

當與大軍會于何地又聞遼主將白五院司來拒戰乃倍道兼行一宿而至遼主遁去復破耿守忠兵時弟扎保廼沒于陣天眷中贈爲特進罕已撫定西路州縣部族謁上于行在所遂從取燕京平日賜以金器有差還軍爲鶻濛以爲都統昃勅極烈幹魯副之駐軍雲中寄以方面太宗卽位入見奏先帝時山西南京諸部漢官軍帥皆得承制除授今南京皆循舊制惟山西優以朝命詔一用先帝燕京所降詔勅從事給以空名宣頭百道當遷官資者以便宐度其勤力而遷授之宋人請割諸城復奏先帝征遼之初圖宋協力夾攻故許以燕地及宋旣盟之後請加幣以求山西諸鎮當時辭其加幣盟以無容逋逃誘擾邊民今宋數路招納叛亡厚以恩賞累書叛人姓名約童貫期以月日一無所致盟未朞年今尚如此可望其萬世守約乎且西

鄆未寧割付山西諸郡則諸軍失屯據之所將有經略或難持
久請姑置勿割上悉如所請諸將獲耶律馬哥歸之京師詔給
其軍戰馬七百匹并田種千石米七千石以賑新附之民諸路
戶口按籍查索比及農時度地以居又請分宗望兵討諸部詔
別給以精銳五千遣往經略夏國奉表稱藩上甚嘉之復賜良
馬十匹使自擇二匹餘賜羣帥又令按籍索張覓及逃亡戶口
于宋宋人不遣與宗翰等俱請伐宋以爲左副元帥由太原路
進發自河陰降朔克代圍太原府敗宋河南陝西援兵四萬于
汾河之北殺萬餘人以久不聞趨汴之問留銀米可等守圍率
師而南降威勝軍下隆德府卽鄆州至澤州始知割三鎮講和宋
遣路允迪以詔書來太原人不受詔取文水及孟縣復留銀米
可圍太原罕還山西得宋少帝所貽余睹書以興復遼社稷爲

辭蕭仲恭獻之詔復伐宋八月發自西京九月丙寅克太原執
宋經略使張孝純等鵠沙虎取平遙降靈石介休孝義諸縣十
一月甲子自太原趨汴降定諸縣遂取澤州撒剌荅等先已破
天井關進逼河陽破宋兵萬人降其城復攻懷州克之丁亥渡
河閏月至汴與宗望會兵宋約盡河爲界復請修好不從丙辰
銀术可等克汴州辛酉宋少帝詣軍前十二月癸亥奉表降遣
勛就軍中賜宗翰宗望使皆執其手以勞之將帥士卒立功者
第其高下遷賞其殞身行陣沒於王事者厚卹其家賜贈官爵
務從優厚四月以宋三主并宗族四百七十餘人及珪璋寶印
袞冕車輅祭器大樂靈臺圖書與大軍北還七月頒賜鐵券除
反逆外餘皆不問賚與優厚奏河北河東府鎮州縣請擇前資
官良能者任之以安新民上遣耶律暉等從行詔黃龍府路南

路東京路於所部各選如暉者遣之罕趨洛陽宋董植以兵至鄭州州人復叛罕使諸將擊植軍復取鄭州遂遷洛陽襄陽潁昌汝鄭均房唐鄧陳蔡之民於河北遣婁室平陝西州郡時河東寇盜尚多乃分留將士夾河屯守還師山西昏德公致書請立趙氏奉職修貢民心必喜萬世利也罕受其書不荅康王遣王師正奉表密以書招誘契丹漢人獲其書奏聞下詔南伐河北諸將欲罷陝西兵併力而南河東諸將不肯曰陝西界隣西夏事體重大罕奏初與夏約夾攻宋人夏人弗應反與耶律大石交通今吾若舍陝西弗攻彼必謂我有急難且河北不足虞宜先事陝西略定五路既弱西夏然後取宋議久不決請于上曰先窮康王所往追之俟平當立藩輔如張邦昌者陝右之地亦未可置而不取乃使婁室蒲察帥師繩果婆盧火監戰平陝

西銀朮可守太原耶律余睹留西京平會東軍于黎陽津會宗
輔于濮進兵至東平宋知府權邦彥棄家宵遁降其城駐軍東
平五十里復取徐州盡得宋人所運江淮金幣與宗輔分給諸
軍遣拔离速烏林荅泰欲馬五襲康王于揚州未至百五十里
馬五以五百騎先馳至城下王聞兵來已於前一夕渡江致書
請存趙氏社稷削去皇帝大號自稱宋康王趙構譴致書大金
元帥閣下其四月七日兩書皆然元帥府荅其書招之使降康
王入海追之弗及入朝語宗幹希尹等曰儲位久虛先帝嫡孫
當立我日夜未嘗忘此相與定議立宗峻子合剌固請再三太
宗以其大臣義不可奪從之拜爲國論右勃極烈兼都元帥熙
宗卽位加太保尚書令領三省事封晉國王乞致仕不許天會
十四年七月辛巳薨年五十八追封周宋國王生平內能謀國

外能謀敵、決策制勝、有古名將之風。臨潢既捷、諸將皆怠忽、而請伐不已、越千里以襲遼主。諸將皆畏顧而請期不已。復好訪問女直老人、多得祖宗遺事、觀其欲置江淮專事、陝服當時無有能識其意者。甫釋干戈、斂衽歸朝、以定熙宗之位、義正理直、入服其誠。特以在西京坑殺句降者千人、故後嗣寡少。正隆例降金源郡王、大定間改贈秦王。諡桓忠、配享太祖廟。廷孫秉德、斜哥、斜哥資質鄙惡、貪受財賄、累官曷蘓館節度同知。大定二年、除刑部侍郎、充都統。與副統完顏布輝自東京先赴中都、輒署置官吏、私用宮中財物。事覺、當死。世宗特寬之。斜哥除名、布輝削兩階、解職。復起爲大宗正丞、除祁州刺史。又坐枉法徙鄜州。再起同知興中尹。遷唐括部族節度使。歷開遠、順義軍。復爲御史。所劾三犯、當死。皆以祖父大功特免。後終勸農副使。

宗憲本名阿懶年十六選入學太宗駕幸與諸生上謁見其進止恂雅令誦所習女直字書語音清亮兼通契丹漢字善應對上嗟賞久之從破汴京衆人爭取府庫財物獨載圖書以歸遇朝議制度禮樂往往不足謂方今奄有遼宋當遠引前古因時制宜成一代之法何乃近取遼人制度因仍其舊乎與希尹意合嘗器重之復延爭捷懶宗雋以齊地與宋宗弼如其策果復取之以功授昭武大將軍修國史累官尚書左丞熙宗美其識慮深遠自今以往其盡言無隱宗憲拜謝令攝門下侍郎熙宗以疑似殺希尹久乃問惜語以希尹有大功朕將錄用其孫對曰陛下所念至深死生幸甚以臣言之若不先誅死者無罪生者何由得仕上是其言卽日復希尹官爵孫守道後至宰相皇統五年將肆赦議覃恩止及女直人宗憲奏曰莫非王臣慶幸

豈可有間遂改其文使均被焉轉行臺平章政事天德初爲中
京留守安武軍節度使封河內郡王改太原尹進封鉅鹿郡王
正隆例奪王爵再遷震武武定軍節度使開世宗卽位先已棄
官來歸會遣使召之曰叔若能來必速至此毋爲志寧彥敬所
遏使者相遇中都遂見上于小遼口除中都留守卽遣赴任與
元帥穀英同議軍事明年改西南二京攝行臺尚書省事時年
已老上因其耆舊更歷事多皇太子年少謹訓導之名爲太子
太師俄拜平章政事賜以太祖實錄上以移剌高山奴父祖有
功擢爲祕書少監宗憲言其前爲寧州刺史倣很貪墨不可以
玷班行卽命追還制命會又有言諸路猛安謀克怙其世襲多
擾部民請同流官以三十月爲考宗憲上議昔太祖撫定天下
誓封功臣今若改爲遷調卽非舊約臣謂但當明核善惡進賢

退不肖有不職者擇弟姪中賢者代之上從其議大定五年拜
右丞相六年九月癸丑薨年五十九上輟朝悼惜命百官致奠
賜以銀絹重綵

次幹魯康宗初使佐幹帶伐幹豁勃堇拔其城以歸又代幹賽
將兵數月對築九城與高麗抗出戰入守幹賽囚之卒敗高麗
渤海人高永昌見遼政日衰領兵三千屯東京八廐口妄意非
常乘東京漢人有怨誘諸渤海弁其戍卒入據東京旬月之間
遠近響應有兵八千僭稱帝號改元隆基遼人討之不能克乃
詔幹魯統內外諸軍伐之幹魯方趨東京遼兵六萬來攻照散
城阿徒罕勃堇烏論石準與戰於益褪之地大破之五月幹魯
取濟州末昌聞而大懼使家奴鐸刺資金印銀牌願去名號稱
藩渤海降人高禎言其意非真特以緩師亟命進兵末昌率衆

來拒遇于沃里活木我軍既濟敵衆不戰而却遂北至東京城

明日復戰大敗之未昌奔長松島東京人恩勝奴仙哥等執其

妻子以城降捷不野復執未昌及鐸刺以獻皆殺之拜爲南路

都統迭勃極烈倅賊九月謁見于婆魯買水上慰勞之辛亥幸

其第張宴官屬皆預賜賚有差燭俛水部實里古達殺酬幹僕

忽得以叛命分胡刺古烏春之兵討之幹魯至石里罕河實里

古達遁去追及于合撻刺山誅其首惡四人撫定餘衆下詔嘉

獎分其民三百戶爲一謀克推衆所服者領之仍質其子弟而

還西京已降復據城西浮圖下射攻城者因與鶻巴魯攻奪浮

圖率精銳下射城中破之夏國使李仁輔將兵救遼與婁室合

軍擊敗於天德追至野谷殺數千人餘兵二萬渡澗水漂溺不

可勝計拜爲西南路都統遣勃刺淑撒曷憇以兵往襲遼主照

里背砦各邀擊之遣使奏捷賴陛下威靈屢敗敵兵今已無歸
勢必來降已嚴戒隣境毋納宋人詔徧諭有功將士俟朕至彼
當次第推賞太祖還京又命副宗翰爲西北西南兩路都統任
以便空奏夏人屢求援兵不盡歸我戶口沮吾追襲遼主宋人
敢言自取疆土于夏侵畧新所割地誠有異圖宜謹守備詔盡
索在夏戶口通聞兩國事審處之因請弗空割山西地與宋則
遼不能與郭藥師交通詔從之復奏宋不遣歲幣戶口事且將
渝盟不可不備與宗望等意合乃以行西南西北兩路都統事
天會五年十二月乙亥薨皇統五年追封鄭國王配享太祖廟
庭子撒八銀青光祿大夫孫賽里

次劾孫亦柔善人天會大封宗室追封王爵正隆例降鄭國公
子昱本名蒲家奴嘗從太祖伐留可鳩塔又使招降詐都康宗

八年係遼籍女直紇石烈部阿里保太孛阻兵招納亡命命以偏師夜行盡止抵石勒水襲擊破之盡俘其孥而還邊氓自此無復亡者後與宗雄視泰州地土太祖因徙萬家屯田于其地天輔五年拜吳勃極烈副都統朶領內外諸軍以取中京遼帝西走朶使昱以兵一千助撻懶擊遼都統馬哥不及乃與賽里斜野降其西北居延之衆降民與毗室部稍復逃叛率兵襲之至鐵呂川遇敵八千力戰兵敗值察剌以兵來會追及敵兵于黃水與燉按打海被十一創竟敗敵兵而還獲畜產甚衆軍于旺國崖西賽里亦以兵會太祖自草深追遼帝昱爲前鋒戒之曰彼若深溝高壘未可與戰卽偵伺巡邏勿令遞去以俟大軍若其無備便可擊也上次胡剌畛川吳十馬和尚至小魚潭夜潛入遼主營執新羅奴以還遂知遼帝所在昱等晝夜兼行追

及于石輦鐸遼帝遜去復與宗望追至烏里質鐸不及而還後
佐宗翰爲西北西南兩路副都統討平烏虎部叛天會間爲大
司空封王天眷二年宗磐等被誅其辭連及奪職遂薨天德初
配享太祖廟廷正隆例封豫國公

次麻頗天會十五年山世襲猛安封王正隆例封虞國公子
謾都本孝友恭謹多謀而善戰年十五隸軍中從攻窩盧歡及
係遼女直胡失荅等爲變身自爲質從歸中途以計殺守者而
還攻寧江州取黃龍府破高末昌取春黎州皆有功多受賞賚
遂爲謀克討嶺東未服州郡過土河東山敗賊三千人奚契丹
寇土河西與猛安蒙葛麻吉擊之摧鋒力戰破其衆九萬奚衆
萬餘保阿隣旬復擊敗之降其旁近居人復以五百騎破遼兵
一千生擒其將以歸與闍母攻興中府中流矢卒年三十七天

眷中贈金紫光祿大夫諡英毅 弟蠻祝襲父猛安卒子掃合

襲卒子撒合輦襲卒子惟銘襲惟銘本名沒烈字子鑄駢脅多

力喜周給人至寧初守楊文閣有功兼都統護漕運負祐二年

佩金牌護親軍家屬遷汴遙授祁州同知充提控三年破紅襖

賊於大沫堦惟銘入自北門諸軍繼進生獲劉二祖功最遷泰

安軍節度副使改遂王府尉都水少監東平府治中紇石烈牙

吾塔爲同知以刃誤傷之罪當削降仍從軍自請討花帽賊于

曹濟間行省蒙古綱奏其功復前職遷邳州經略使卒子從傑

襲猛安累功遙授鎮南軍節度副使

次阿爾合懋聰敏辨給凡一聞見終身不忘復健捷善戰年十

八值世祖擒臘酷暮稜水人尚反側不自安介往撫察之又與
斜鉢合兵攻窩謀罕棄城逃去從撒改討平雷可其功居多贊

成太祖伐遼在行間屢有戰功擒蕭海里使獻馘于遼及還勸
進既卽位獨與宗翰以耕具九事爲獻伏願陛下毋忘稼穡艱
難太祖敬而受之頃之爲國論乙室勃極烈女直初無文字獨
能默記祖宗族屬并時事會破遼獲契丹漢人命與斜葛同修
本朝譜牒凡見人舊雖未嘗識聞其父祖名卽能道其部族世
次所出或偶及積年舊事人悉遺忘輒一一辨析言之有質疑
者皆釋其意義世祖稱爲人不可及天輔三年寢疾宗翰日往
候視因得祖宗舊俗法度上臨問以國家事對曰四方未平國
俗多以良馬殉葬可禁止之乃獻平生所乘戰馬上嘆曰臨終
不亂念及國家事真賢臣也薨年四十九上哭之慟及葬復親
臨之熙宗時追封隋國王天德中降爲公贈開府儀同三司大
定間配饗太祖廟廷諡曰剛憲子寶也幹論孫宗道宗尹宗寧

幹論改名晏明敏多謀略通契丹字天會初烏底改叛太宗幸
北京以晏有籌策召問方略言今叛衆依山據險地勢險阻林
木深密吾騎卒不得成列未可以歲月破也乃具舟楫艤江令
諸軍陽於高麗運木爲柵多張旗幟示以持久計聲言俟大軍
畢集而發潛用舟師浮江而下直擣其營遂大破之其據險之
衆不戰而潰月餘一境皆定師還授左監門衛上將軍爲廣寧
尹入更吏禮兩部尚書皇統元年爲北京留守改咸平尹徙東
京天德初封葛王同判大宗正事進封宋王授世襲猛安海陵
遷都命留守上京授金牌一銀牌二在任五年累封豫許越三
王貞元初進封齊王正隆例削王爵改西京留守未幾爲臨潢
尹致仕還居會寧海陵南伐其子愿里乃在軍前迺回白彥敬
等聞之使會寧同知高國勝拘晏家族世宗卽位遣晏兄子鶴

魯補驄驛促召率宗室數人入見卽拜左丞相封廣平郡王宴
勞彌日未幾兼都元帥大定二年進拜太尉復致仕還鄉里薨
詔有司致祭賻贈銀幣甚厚 宗道本名八十通周易孟子善
騎射大定五年充閤門祇候累除近侍局使遇右丞相烏古論
元忠左將軍僕散揆等嘗因燕集有所竊議卽密以聞世宗嘉
之授右衛將軍出爲西南路副招討章宗卽位改平陽府同知
陝西路副統軍左宣徽使移刺仲方舉以自代除西北路招討
使故事諸部駕馬八百餘疋悉辭不受諸部咸治提
刑司察廉名爲殿前右副都點檢尋轉陝西路統軍使以鎮靜
得軍民心特進三階兼知京兆府事夏旱俾長安令取太白湫
水部迎於遠郊及城而雨是歲大稔人以爲精意所感刊石紀
之承安二年爲賀宋正旦使復改河南路統軍使泗州民張偉

負楚州賈人王萬貨錢五千餘貫三年不償萬理索誣以言彼
界事情始疑其寃廉問果得實乃坐偉而歸萬人服其明改知
河中府有惠政民立像於層觀以時祭之移知臨洮以病解泰
和四年卒贈龍虎衛上將軍 宗尹本名阿里罕賽也之子初
充護衛改牌印祇候爲右衛將軍歷順天歸德彰化唐古部族
橫海五軍節度使正隆南伐領神略都總管先鋒渡淮取揚州
及瓜渡大定二年改河南路副都統時宋陷汝州殺刺史烏古
孫麻潑及漢軍二千人宗尹遣萬戶孛朮魯定方完顏阿喝懶
夾谷清臣烏古論三合渠難訛只將騎四千往救復取汝州除
大名尹頃之爲河南路統軍使遷元帥左都監南京留守諭以
卿年少壯心力多滯前任點檢京尹勤力不怠而處事迭錯勉
脩職業以副朕意賜通犀帶麻馬八年置山東路統軍司卽以

爲使俄遷樞密副使錄其父功授世襲蒲與路屯河猛安并親
管謀克加太子太保上問宰臣宗尹才雖無大過人而性行淳
厚且國之舊臣朕欲相之何如宰執皆曰甚協衆望卽日拜平
章政事封代國公兼太子太傅上問民間甚苦錢幣不通對曰
錢者有限之物積于上者滯於下所以不通海陵軍興爲一切
之賦有萊園房稅養馬錢大定初軍事未息調度不繼故因仍
不改今天下無事府庫充積悉宐罷去世宗從之論曰卿留意
百姓朕復何慮太尉守道老矣捨卿而誰他日謂宰臣宗尹治
家嚴密他人不及復顧謂宗尹政事亦當如此有頃北方歲饑
議輸粟賑濟廷臣皆言舊積有餘秋成在近不必更勞輸輓宗
尹曰國家平時積粟本以備凶歲必待秋成則憊者衆矣人有
損瘠其如防戍何復從之時詔凡承襲人不識女直字者勒令

習學會宗尹子銀朮可襲猛安守道子神果奴襲謀克上嘗識
二子但習漢字未習女直字自今著令女直契丹漢字皆學其
一節許承襲上將幸上京因臨潢烏古里石壘族皆不登奏言
南道歲熟芻粟賤遂由南道往既至問同簽大宗正事宗寧不
能撫其宗室子孫往往不事生業令察其事隨空懲戒奏曰隨
仕之子父後不還本土以此多奸游蕩命名還之及宴宗室于
皇武殿擊毬爲樂語以其間人材孰可用者因舉奉國幹事子
按出虎豫國公昱曾孫阿魯可任使上曰度可任何職咸以爲
奉御更訪其餘以聞二十七年乞致仕詔卿久任外官不聞有
過失但恨用卿稍晚今精力似衰若勉留卿四方恐以爲私今
雖致仕將居何所朕欲留卿時相從游如何對曰臣餘閑之年
豈不欲留但恐聖主心厭棄耳况鄉里故老亦無存者雖到彼

尚誰與游因賜甲第一區凡宴集輒微皆從焉明年薨宗寧
本名阿土古性勤厚明敏有大志起家爲征南都統從海陵戰
瓜洲渡功最歷祁州刺史大定二年爲會寧府路押軍萬戶擢
歸德軍節度使時方旱蝗督民掩捕如數給粟數日盡絕移鎮
寧昌天德軍改知臨潢府事世宗嘗語宰臣宗寧智慮雖淺然
所至人皆愛之卽命爲行軍右翼都統充賀宋正旦使累遷兵
部尚書授隆州路和剛猛安烈里沒世襲謀克出知大名府事
徙鎮利涉軍俄同簽大遼親府事素因多病欲處以涼地俾知
咸平擢其子符寶郎尙爲韓州刺史以便養無幾復入同判大
遼親府事拜平章政事明昌二年薨爲人約儉如寒素臨事不
苟其鎮臨潢聞知隣國有警民乏糧卽令以牛易粟敵知有食
遁去後窩幹亂邊民復苦無牛仍令入粟易牛旣而民得牛而

含粟倍於舊其經畫如此

次設都訶穆宗時統門渾蠢木合流地烏古論部人忽沙渾勃
董之子留可詐都二人間誘與純塢塔兩部之民作亂合黨揚
言徒單部烏古論部二黨咸十四部爲一蒲察部之黨七部爲
一凡三十五部完顏部祇十二而已以三十五部戰十二部必
可取勝由是敵庫德鈍恩皆叛與世祖降附諸部亦皆離心時
不從亂者惟烏延部達紀保之子斜勒勃董使其兄保骨臘以
其甲來歸及統門水溫剋痕部阿里保勃董乞兵爲援撒葛周
勃董等皆使人來告難穆宗使謾都訶伐之分以太祖甲四十
迎擊大破之降米里迷石罕城留可先在遼未獲詐都亦詣蒲
家奴降太祖釋之諸部皆安業如故天會二年爲阿捨勃極烈
參議國政明年三月乙亥薨天會中追封王正隆例降鄭國公

明昌五年諡定濟次子謀里也海陵時誣以謀反子孫二十人皆被害

庶弟烏古出初昭祖無子與次室達胡末禱于巫曰男子之兆雖見然性不馴良長而酗酒殘忍無親親之恩不可受也昭祖方念後嗣未廣亦願受之既長名之曰烏古出方言曰再休及昭祖沒屢悖嫡母欲害景祖方謀殺之部人怒以爲此子生性主父母之業奈何殺之遂免生習不失亦作辭不失長而健捷能左右射肅宗拒桓被散達世祖使習不失先陣於脫豁改原待吾三揚旗三鳴鼓卽棄旗決戰死生惟在今日世祖旣出習不失白陣後奮擊敗其騎軍所乘馬中九矢不能馳遂棄之陣中步趨而出馬亦隨歸桓被散達旣敗論功居多旣而疑木甲罕里爲與烏春等爲變遣單騎往觀罕里爲與忽魯置酒樓上以飲

之習不失聞其私語若將執已者卽一躍而下傍出藩籬之外棄馬奔歸其摧鋒居前勇力強趨率此類孟乃約烏春舉兵使肅宗前戰束、繼、縱、火、煙、焰、蔽、天、大敗烏春執孟乃以歸復獲麻產獻馘于遼拜爲詳穩又佐撒改攻下留可城太祖伐遼使領千兵夾侍左右出河店之役惟習不失策與太祖合卒破十萬之師挫其軍鋒相與勦進收國元年拜阿買勃極烈其倚任與撒改比天輔七年令輔太宗居守會耶王昂違律失衆法當死請于太祖兄弟骨肉恩當掩義寧屈法以全之今國家獲燕京納宋幣生世宗迭有大虞可滅昂死若主上有貴以我爲解太宗然之杖昂以聞是歲七月薨正隆二年贈開府儀同三司追封曹國公大定三年進封金源郡王配饗太祖廟廷諡曰忠毅子鶻沙虎國初有功天會中爲眞定留守孫撻不也名宗亨

性忠謹天輔初充護衛擒宗磐宗雋有功加忠勇與昭信校尉
尚廐局直長三年陞本局副使丁父憂會選有材望爲宗正官
屬起復拜淑溫特宗室將軍改會寧府少尹歷登獻二州刺史
爲羣牧使北京路轉運同知改澤州定國軍節度使海陵南伐
領武陽軍都統管過淮世宗卽位班賜手詔入朝授右宣徽使
未幾爲西北路兵馬都統討契丹窩斡令統萬戶烏延查刺七
謀克兵以爲左翼賊兵來犯查刺奮擊敗之宗亨指盡失空遂
敗回又縱軍士取賊所棄資囊人畜而自有之坐降寧州刺史
餘見窩斡傳後 弟賽里名宗賢初爲護衛從都統杲襲遼帝
駕爲樂又從蒲家奴以兵助憊懶襲耶律馬哥使與斜野裴蒲
胡撻達魯古厮列耶律吳十等各率兵分行招諭徙遼留守迪
越家人輜重并降羣牧官木盧瓦得馬甚多使逐水草牧之賽

里等趙榮迭以偏師深入敵邀擊之撤合戰沒蒲家奴至旺國
崖西賽里以兵會之累官至左副點檢天眷二年坐會飲宗傳
家奪爵未幾復之皇統四年授世襲謀克轉都點檢封幽國公
拜平章政事自護衛未十年至右丞相兼中書令皇統八年進
太保左丞相兼修國史與海陵同在相位進太師領三省事以
左副元帥兼都元帥感激思効以報朝廷悼后爲母黨未嘗附
之嘗勸熙宗選後宮以廣繼嗣不少顧忌海陵亦未嘗少有假
借嘗心憚賽里外以屬尊加敬內實忌之知與悼后有怨因共
力排出之爲南西二京留守領行臺尚書省事賽里亦不因是
少變胙王常勝死熙宗納其妻宮中將立爲后賽里爭之弑逆
已行議以熙宗將議立后召諸王大臣賽里信以爲然將入宮
被執猶以爲常勝妻將立而先殺之語人曰誰能爲我言者我

死固不足惜獨念主上左右無助爾遂遇害 弟習不主年十六伐宋攻下懷仁縣功居最從宗輔經略陝西以兵七百入丹州諸山遇盜三千擊敗之又破賊四千生擒其將出隴州以兵四百敗敵數千宋兵七千來取鞏州復擊走之又以五千兵敗吳玠之衆三萬白塔口遇敵五千復敗之別降定遠等寨皇統二年授臨洮尹同知丁憂起復改孟州防禦使遷臨洮尹復以罪罷正隆三年起爲京兆尹改河南尹卒年五十八

奔睹名昂景祖弟孛黑之孫斜幹之子年十五侍太祖會令數人兩兩角力祖顧之曰汝能此乎對曰有命敢不勉遂連仆六人祖喜曰汝吾宗弟自今勿遠左右居數日賜金牌令佩以待年十七伐遼佩所賜金牌從軍平燕京策功賜甲第一區天輔六年都統杲遣與溫敦思忠詣宗翰追遼主于鴛鴦濼天會二

年南京叛閹母又遣與劉彥宗分兵討之宗望伐宋承制拜爲河南諸路兵馬都統稱金牌郎君及攻汴以兵三千爲宗弼前鋒時遣使入城宋人不納比暮昂兵千人先馳至北門諭之以事遂得入宗望至汴令閹母慍懶等屯于城之東北四慮宋主遁去遣昂等率輕騎環城巡邏所領止八謀克遇敵萬人與戰敗之溺死其步軍過半七年大軍渡江遣昂等以兵追宋主時已入會稽俄爲堅守計列兵數千陣於郭東竹葦間諸將欲擊之昂曰此詐也不若急攻城不然將由他門逸去諸將猶豫未決宋主果單舟於他門入海不獲而還宗弼經略熙秦遣昂與撒离喝領兵八千攻取河西郡縣遂取寧洮安隴二寨進至河州安撫使郭寧偕降攻樂州復進取三寨至西寧州都護許居簡以城降吐蕃酋長之孫趙鈐轄率其所部木波首領五人來

降昂別領兵四千往積石降其軍及所部五寨官吏追吐番鈴
轄等十二人至廓州招之不下攻取之天眷元年投鎮國上將
軍除東平尹明年夏宋將岳飛兵十萬來攻城中軍祇五千倉
卒出禦時桑柘方茂使於林間多張旗幟以爲疑兵自將精兵
陳於前飛不敢動相持數日而退昂勸兵追襲至精口附水屯
營時霖雨晝夜不止促衆北行諸將皆諫昂怒不應鳴鼓督之
下令敢後者斬棄去幾二十里而止是夜宋人果來劫營無所
得而還諸將入賀且問其故昂曰宋兵沿流而下者走也逆流
而上者誘我必追也今大雨泥淖彼所行安我陸行旁士卒饑
乏弓矢敗弱我軍居其下流勢不便利其襲我必久衆皆稱善
飛復聞邳州甚急城中兵纔千餘守將懼遣人求救昂語以嘗
至其城西南隅有塹深丈餘可速實之守將如其教填之飛果

自此穴地而入。知有備遂止。昂舉兵以爲聲援。飛乃退在東平。七年改益都尹。累東北路招討使。崇義軍節度使。遷會寧牧。天德初徙節安武軍。遷元帥。右都監轉左監軍。授上京路移里閔幹魯渾河世襲猛安海陵以其功不足爲酬。益以四謀克讓其三於族兄弟。祇受親嘗謀克。尋拜樞密副使。加太子少保。進樞密使。尚書左丞相。坐怒族弟妻去衣杖其脊。亦被杖五十。久之拜太尉。封濟國公。又進太保。判大宗正事。累封楚魯衛齊四國公。南伐爲左領軍。大都督。因辭濟江舟小。海陵怒詔與蒲盧渾明日先濟。昂懼欲亡去。抵韓復遣人止之。曰前言一時之怒耳。旣而軍變使人至南京殺太子光英。遣其子宗浩與塔牌印祇候回海等奉表入賀。兄曰世宗深加慰勞。進封漢國公。拜都元帥。行帥府。山東經略邊事未幾卒。遷睿宗皇帝梓宮以爲勅葬。

使事畢還鎮三年召至京以疾薨年六十四上輟朝臨奠賻銀絹重綵妻大氏卽海陵母之從姊見昂在海陵時縱飲沉醉數日不醒及還自揚州爲置酒私第未數行輒臥不飲怪而問之昂曰吾本非嗜酒者若向時不自沈晦被殺久矣今遇遭明時正當自愛聞者稱之素親睦兄弟尤善施予遇親族有貧困者必厚給之至茵帳衣食器皿僕馬之屬一無所吝人或勸爲子孫計荅曰人各有命但使其能自立爾何至爲奴使耶君子以爲達 宗浩字師孟本名老漢海陵時爲入殿小底馳賀世宗見之喜命充符寶祇候從父山東幕府領萬戶授兵馬都總管判官父憂起復襲猛安職爲河南府判官母喪服闋授陝州防禦同知察廉能第一等陞彰化軍節度同知累遷同樞密院事改曷蘓館節度世宗稽有才幹可及者無幾二十三年徵爲

大理卿踰年授山東路統軍使兼知益都府事陞辭諭以卿年
尚少宐體朕意因賜金帶遣之二十六年爲宋生日使還授刑
部尚書俄拜參知政事章宗卽位出爲北京留守轉同判大睦
親府事北方有警命佩金虎符發上京等路軍萬人駐秦州便
宐從事時以糧儲未備且度敵未敢動遂分其軍就食隆巖間
是冬果無警北部廣吉刺者尤桀驁屢脅諸部入塞謂乘其春
暮馬弱擊之時阻鞑亦叛詔議其事行省襄謂若攻破廣吉刺
則阻鞑無東顧憂不若留之以牽其勢宗浩奏國家以堂堂之
勢不能掃滅小部顧欲藉彼爲捍乎臣請先破廣吉刺然後提
兵北滅阻鞑下詔諭以將征北部固卿之誠更宐加意毋致後
悔有合底忻者與山只昆皆北方別部恃強中立無所羈屬往
來阻鞑廣吉刺間連歲擾邊且與娑迷火等相結宗浩規知廣

吉刺之勢必分彼既畏我見討而復擊肘仇敵則理必求降因遣主簿撒領軍二百爲先鋒戒以若廣吉刺降可就徵其兵以圖合底忻仍偵餘部所在速使來報大軍當進與汝擊破之必矣撒入敵境廣吉刺果降遂徵其騎萬四千馳報以待宗浩前軍至忒里葛山遇山只昆所統石魯潭灘兩部擊走之斬首千二百級俘生口車畜甚衆進至呼歇水敵勢大感於是合底忻部長白古帶山只昆部長胡必刺及婆速火所遣和火者皆乞降承詔諭遣而胡必刺部迪列土近在移來河不肯降移軍討之斬首三百級赴水死十四五獲牛羊車帳合底忻等棄輜重遁去撒與廣吉利部長忒里虎追躡及之於窰里不水縱擊大破之婆速火九部斬首溺死四千五百餘獲驢馬牛羊不可勝計軍還婆速火乞內屬并請置吏上優詔褒諭遷光祿大夫以

所獲馬六千置牧以處之明年拜樞密使封榮國公奏泰州所置東北路招討司去境三百里每敵入出兵遼遠敵已遁去乃徙之金山以據要害設副招討二員往來上下敵不敢犯命行中都山東河北省事括籍屯駐軍人地土官田爲民所占凡得地三十餘萬頃還坐憲司糾以娼女自隨出知真定府徙西京留守復爲樞密使拜右丞相超授崇進會北邊不寧議築據壘以備守戍命督其役功畢賜詔褒賚撤里部長隨括里入塞以兵追躡與僕散揆合擊之殺獲甚衆敵遁去徵還入見優詔獎諭躡還儀同三司賜玉束帶金器重幣進左丞相宋人叛盟命兼都元帥代揆進討馳至汴大張兵勢親赴襄陽巡師而還宋人大懼命樞密張巖以書乞和備述皇帝天覆地載之仁與元帥海涵春育之德兵端之閒雖本朝失于輕信然痛罪姦臣之

敵亦非不早大國兵尚未出卽捐已得之泗州諸軍屯于境外者盡令徹戍而南悔艾之誠于茲可見江外之地特爲屏蔽儻如來論何以爲國至于首事人等誤國之罪固無所逃若使執縛以送則本朝不得自致其罰所有歲幣前誓已增大定所減之數於通謝禮幣之外別致微誠庶幾以此易彼其歸投之人皆雀鼠偷生一時竄匿往往不知存亡當隆興時固有大朝名族貴將南來者嘗約各不取索况茲瑣瑣誠何足云至如泗州等處驅掠人悉當護送歸業夫締新好者不念舊惡成大功者不較小利欲望力賜開陳捐棄前過闊略他事玉帛交馳歡好如初復誓方信孺重以書來詳味其辭於請和之意雖若婉避而所盡之事猶未悉從惟言當還泗州等驅掠而已至於責貢幣則欲以舊數爲增追叛亡則欲以橫恩爲例而稱臣割地縛

送姦臣三事。又並飾虛說。弗肯如約。豈以爲朝廷過求有不可從。將度德量力。背城與我一角勝負哉。乃者帥府奉命征討。未及出師。姑以逐處戍兵。隨宜捍禦。所向摧破。旋即底平。爰及泗州。不勞而復。今乃自謂折其已得。斂軍微戍。以爲悔過之効。是豈誠實之言。據陝西宣撫司申報。今夏宋人犯邊者十餘次。並爲我軍擊退。梟斬捕獲。蓋以億計。然則所來請和。其理安在。又言名分之論。今昔事殊者。蓋大定之初。失在正隆。致南服不定。故特施大惠。易爲姪國。以鎮撫之。今以小犯大曲。在於彼既以絕大定之好。則復舊稱臣於理爲宜。若爲非臣子所敢言。何在皇統時。獨敢言哉。又謂江外之地。將爲屏蔽。夫藩籬之固。當守信義。如不務此。雖長江之險。亦不可恃。何況區區兩淮之地乎。昔江左六朝之時。淮南屢嘗屬于中國。至後周顯德間。南唐李

景獻盛舒斬黃豎江爲界是亦皆能爲國今信孺齎到誓書乃云疆界並依大國皇統與彼隆興年已盡爲定若是則既不言割彼之地翻欲得我之已有者豈理也哉又通謝禮幣之外別備錢一百萬貫折金銀各三萬兩專以塞再指幣之費及歲幣添五萬兩足其言無可准止是復皇統舊額而已安得爲增欽奉聖訓昔宣靖之際聚信背盟我師問罪嘗割三鎮以乞和今既無故興兵蔑棄信誓雖盡獻江淮之地猶不足以自贖况彼國嘗自言叔父姪子與君臣父子略不相遠如能依舊稱臣卽許以江淮之間取中爲界如欲世爲子國卽當盡割淮南直以大江爲界陝西邊面並以大軍已占爲定據元謀姦臣必使縛送緣彼懇欲自致其罰可令兩首以獻茂幣亦更添五萬兩足表悔謝之實方信孺言語反覆詭詐之罪過於胡昉不足取

信如李大性朱致和李璧吳瑄輩似乎忠實可遣詣軍前聚議
然自古兵交容使人在其間姑放令回報其後宋人竟請以叔
爲伯增歲幣備犒軍銀兩姦臣佞冑師旦首以獻而乞盟焉泰
和七年九月薨于汴計聞上震悼輟朝命其子宿直將軍天下
奴奔赴喪所仍命葬畢持給像至都臨奠以南京副留守張巖
叟爲勅祭兼發引使莒州刺史女奚列孛葛速爲勅葬使仍摘
軍前武士及旗鼓笛角各五十并隨行親屬官員親軍送至葬
所賻贈甚厚諡曰通敏

弘簡錄卷二百二十三

明刑部員外郎仁和弘齋邵經邦學

皇清翰林院侍講學士四世孫遠平校閱

載紀 金內族三 世祖以下諸子

幹帶 斜也 子宗義 幹賽 子宗末附木魯 幹者 孫璋 開母 子宗敘

吾都補 子鄭家附壽 撒肉喝 醜淡 撻懶

烏野 子宗秀 掃合 宗雄 子蓋魯虎按答海 阿賚 隈可

世祖第三子幹帶太祖同母弟自幼於眾弟中最愛之年二十餘從撒改伐爾可為裨將議主攻城太祖將至軍迎謂之曰留可城且下勿惑他議太祖從之眾議乃決幹帶急起治攻具其夜進兵攻城迎明破之因盡平二涅襲虎路二蠻出路寇盜康宗二年蘇濱水諸部不聽命令與幹賽幹魯同往治其行次

活羅海川撒阿村名諸部官吏告諭皆至惟舍國部幹豁勃董
不至將兵伐之募軍于蘇濱水幹豁完聚固守攻而拔之進師
北琴海闊登路攻拔泓貳城取叛者以歸幹准部狄庫德勃董
職德部廝故速勃董既至復亡去遇鳩塔於馬紀嶺執二人以
降太祖以事如寧江州欲與偕行辭以兵役久勞未及息遂不
果往太祖還至來流水忽夢其家有變覺而深念之至則聞已
寢疾過家門不入徑至其家問疾遂薨年三十四太祖哭之慟
爲人剛毅果斷服川整肅臨戰決策有世祖風軍旅之事多專
任之及太祖平遼恨其不及見天會十五年追贈儀同三司封
魏王諡定肅孫活里甲爲人坦率善修飾海陵惡之誣以與宗
義謀反殺之

第五子斜也改名杲亦與太祖共母收國元年爲吳勃極烈天

輔元年領兵一萬攻秦州下金山縣降女固脾室四部及渤海人遂克秦州移城中積粟於烏林野賑先降諸部因徙之內地五年爲忽魯朮極烈都統內外諸軍取遼中京諜知遼人欲焚芻糧徙居民遯去奚王霞末又欲窺我兵少則迎戰若不敵則退保山西其實皆無鬪志杲乃委輜重以輕兵擊之六年正月克高恩回紇三城遯兵聞風不戰而潰遂克中京獲駝馬牛羊器甲車兩分兵屯守要害遣使奏捷獻俘詔曰汝等提兵于外克副所任攻下城邑撫安人民朕甚嘉之更當熟議見可則行如欲益兵具數來上無恃一戰之勝輒自弛慢其善撫存降附宜諭將士使知朕意奚王遣騎兵三十餘紿以明旦乞降杲信之使阿里出等往迎兵乃圍之納合鈍恩等下馬據坂皆殊死戰因敗霞末追殺至暮而還宗翰移書請進兵迫遼主杲意未

決宗幹勸以當從其策乃約共會奚王領始定議出青嶺朔羊城深會軍襲擊遼主山草深西走其都統馬哥趙摘里撻宗翰遣撻懶往擊兵祇一千杲益之獲遼樞密使得里底節度使和尚雅里斯余里野等使招西京降後叛者不從命諸將力攻取之留守蕭察剌踰城降分遣諸將招撫未降州郡及諸部族復書耶律捏里賁以不先稟命上國輒稱大號若能自歸當以燕京留守處之捏里復書昨卽位時在兩國絕聘交兵之際奚王與文武百官同心推戴何暇請命今諸軍已集儻欲加兵未能束手待斃昔我先世未嘗殘害大金人民寵以位號日益强大今忘此施欲絕我宗祀於義何如儻蒙惠顧感恩何已杲復書閣下向爲元帥總統諸軍任非不重竟無尺寸之功欲據一城以抗國兵不亦難乎所任用者前旣不能死國今誰肯爲用而

云主辱臣死欲恃此以成功計亦疎矣。韓府奉詔歸者官之逆者討之。若執迷不從期于殄滅後已。杲因請上親征。詔於六月朔旦啓行使馬和尚奉迎于撻魯河上。至解州。杲上謁。上追遣主至回鹘。畛川南伐燕京。次奉聖州。詔自今諸訴訟暫付都統。杲決遣若有大疑。卽令聞奏。太祖既定燕京。還次鴛鴦深。不豫還京師。以杲從太宗卽位。拜爲諸班勃極烈。與宗幹俱治國政。天會三年。代宋杲領都元帥居京師。宗翰宗望分道進兵。八年九月辛酉。薨。皇統三年追封遼國王。天德二年配享太祖廟。廷正隆例封遼王大定十五年諡曰智烈王。字吉改名宗義。天德間爲平章政事。海陵尤忌諸子盛強。欲盡除之。陰使妃父撻不野圖之。詳略互見。撒离喝傳中坐是子孫百餘人皆被殺。惟斜也幼子阿虎里妻撻不野女獨救其死。後封爲王。授世

襲千戶大定初追復宗義官爵贈特進弟補馬字論出阿魯隈
喝並贈龍虎衛上將軍

第六子幹賽穆宗初幹准部人治刺海葛安二字輩暴其族人
幹達罕及抄畧阿活里侵及納根涅所部忒石木紇石烈部族
遣納根涅字輩往治涅擅募蘇濱水人爲兵不聽輒攻略之遂
攻烏古論部敵庫德入米里迷石罕城其人來告時幹賽尚幼
遣與治訶往問狀納根涅雖伏不肯償所取以遞去治訶等皆
不欲追幹賽督軍而進至把忽嶺西毛密水及之大破其衆納
根涅死焉還乃撫定蘇濱水阿里民鈍恩皆復其所執涅母及
其妻子而歸穆宗嘉其能集事器異之康宗四年幹賽將內外
兵佐以劾古活徐苗蒲察秋古廼以伐高麗使宗人朮魯分兵
爲十隊更出迭入遂大破之適其母和徐隈疾篤召還代以幹

魯未幾復至再破高麗軍與朮魯進圍亞魯城克之高麗請和
盡歸前後亡命及所侵故地退九城之戍遂與之和皇統五年
追封衛國王 子宗朮本名挑撻長身美髯忠確勇毅天眷初
預誅宗磐掘寧越大將軍皇統初充牌印祇候五年出爲趙州
刺史轉興平軍節度使改大名尹貞元三年歷昭德臨洮二軍
厚翔尹大定二年入爲工部尚書性滯不習事與蘇保衡完顏
余里也遷加伐宋士官賞凡與土賊戰者一槩加之世宗惟其
濫語宰相曰若一槩追還必生怨望其與土賊戰有能以寡敵
衆一人敵三十人以上者依已還爲定改同簽大宗正事震武
軍節度使卒 朮魯後從太祖克寧江州收黃龍府山河店達
魯古城護步苔岡皆力戰有功東京降爲本路招安副使敗遼
兵破同剗營蘇州漢民叛走朮魯追復之以功爲謀克天輔四

年卒年四十一皇統中贈鎮國上將軍

次幹者天會十五年追封魯王正隆例改封公子神土憲皇統
六年卒贈驃騎衛上將軍 孫璋本名胡麻愈多易略通女直
契丹漢字年十八元帥撒离喝引在麾下以事如京師見宗弼
與語悅之令襲父謀克天德三年充牌印祇候因勸掌中都留
守事左衛將軍蒲察沙离只歸世宗不從遂與守城官烏林荅
石家奴烏林荅愿徒單三勝蒲察蒲查等以兵晨入府殺沙离
只及判官漫撚撒离喝推宗强子阿珣爲留守璋行同知事遣
石家奴三人并中都轉運使左淵子貽慶大興少尹李天吉子
磐率表如東京賀卽位世宗嘉之以三人爲武義將軍充護衛
賜貽慶及第拔從仕郎磐充閤門祇候就以璋爲中都同知心
常不安遂謀爲亂語在可喜傳上誅李惟忠等賞璋爲彰化軍

節度使宋將吳璘出散關據寶雞以西詔璋赴元帥都監徒單合喜軍前任使宋人據原州寧州刺史顏盡門都攻以兵四千不克宋將姚良輔兵十萬又至權副統完顏習尼列引千騎援門都諸將畏良輔兵多皆不敢戰璋至會平涼涇州潘原長武等戍兵合二萬人使押軍猛安石抹許里阿補兵二千軍於城北習尼列兵三千軍於城西北十里麥子原皆據高阜爲陣璋以本部兵陣於城西良輔出自北嶺先遣萬人攻阿補自引軍九萬陣麥子原下分爲八陣捍以劍盾行馬外列騎士步卒居中敢死士鎖足行馬間持大刀爲拒別以騎二千襲璋軍璋遣萬戶特里失烏也以押軍猛安奚慶喜照撒兵二千援阿補遣撒屋出崔尹以兵二千益習尼列阿補與宋人接戰良久敗之宋兵在麥子原者最堅習尼列與移剌補奧屯等各兵五千沿

壕爲伏餘兵皆捨馬步戰擊其前行騎士走之行馬以前衝以長槍以後射以勁弓良輔兵稍挫習尼列乘勝麾兵撤其行馬遂破七陣良輔復整兵出習尼列少却而璋已破城下宋兵與習尼列會整兵奮擊僕根等伏兵皆起大破良輔軍斬首萬餘級墜壕死者不可勝數鎖足行馬者盡殪之獲甲矢萬餘器仗稱是良輔亦中兩創脫去遂圍原州穴其西城城圯宋人宵遁璋等入原州璘知京兆尹烏延蒲芮黑寧州刺史赤蓋胡速魯改已去德順復入據之合喜以璋權都統習尼列權副統將兵二萬救德順璋率騎兵前行與璘戰于張義堡遂沙山下敗之斬首數十級追北四十餘里遂至德順城東璘據北城險要爲營兩軍相遇凡五接戰璘軍敗走璋追至城下璘與其城上兵相應以弩夾射璋軍佯却城中出兵來追璋反旆與戰大敗之

合喜遣統軍都監泥河以兵七千來會與璘軍復戰敗之璘遣兵據東山堡璋與泥河急擊之習尼列兵復逼東山堡璘短兵來拒退走其城北營兵六千來戰璋之漢軍少却傷者二百人璘遂焚璋攻其習尼列望見火發亟引將士來赴遂與劉安漢軍三百人擊敗之璋率移刺補猛安兵踰北岡璘軍隔壘而射移刺補少却璘軍三萬皆走險據作三陣亦環以劍盾行馬璋遣萬戶石抹迭勒由別路自後擊之特里失烏也移刺補以二千人當其前射以強弓璘兵大敗墮溝壑者甚衆璋軍度瀕追之斬數千級而還合喜再使查刺來問策諸將皆曰宋兵恃險不善野戰我退軍平涼彼必棄險來就然後可圖璋曰不然彼恃其衆非恃險昔人有言寧棄千軍不棄寸土故退兵不如濟師我退軍平涼彼軍深入吾地固壘以拒將如之何及合喜

親率兵來赴詰旦璘乘陰霧晦冥分兵四道夾戰于城東離而復合者數四漢軍千戶李展率麾下兵先登奮擊璘軍陣動璋乘勝踵擊敗之追至北岡璘走險璋急擊之殺畧殆盡宋經略使荆阜步騎尚三萬自德順西去璋與尼列以兵萬餘追擊之反出其前還自赤溝遇其前鋒敗之復與其中軍戰自日晡至暮乃罷阜乘夜來襲營爲退八十里未曉尼列追之璋兵至上八節宋兵據險爲陣璋捨馬步戰地險不得接相拒至曙宋兵動璋乘之追至甘谷城尼列兵亦至擒宋將朱承以下十二人宋兵宵遁璋遂班師尼列追至伏羌城不及而還命轉西北路招討使名爲元帥左都監兼安武軍節度使賜以弓矢衣帶佩刀加益都尹行至海州宋人棄去得糧三萬六千餘石安集其人復其屯戍五年宋人約和罷三路都統復置陝西路統軍

司以瑋爲統軍使久之兼京兆尹名爲御史大夫瑋奏竊觀文武百官有相爲朋黨者今在臺自臣外無女直人乞不限資考量材奏擬上問朋黨爲誰卽糾治之朕選女直未得其人豈以資考爲限論其人材而已十三年改大興尹爲賀宋正旦使至臨安宋人請以太子接書不從因就館取之且赴宴多受禮物上聞之怒欲寘極刑左相良弼奏瑋爲將大破宋軍譬之已久將因此坑陷亦未可知若遽殺瑋墮其計中上以爲然與副使客省使高翊各杖除名沒入其所受禮物歲餘復起爲景州刺史遷武定軍節度使授山東西路蒲底山鞏兀魯河謀克改臨洮尹十九年卒

第十一子闊母始佐幹魯克濟州城中出奔者邀擊殆盡與高永昌隔沃里活水衆遇淖不敢進獨率所部先濟諸軍畢濟屯

東京城下其人來戰破之于首山殲其衆獲馬五百匹拜爲成
州路副都統令斜葛留兵一千鎮守命以餘兵會于渾河至臨
潢府先登克其外城又從都統杲至中京山城西沿上河以進
城中兵三千餘皆不能守遂克之宗翰等攻西京閭毋婁室於
城東爲木洞以捍蔽矢石於北隅以芻茭塞其隍城中出兵萬
餘將燒之溫迪罕蒲匱率衆力戰復却又爲四輪革車高出於
堞閭毋與麾下乘車先登諸軍繼之遂克西京與遼步騎五千
戰于朔州之境斬首三百級遼騎三百駐于河陰步兵五千屯
馬邑縣南復擊破之擄其營壘盡獲車馬器械又以兵三千擊
遼兵三萬于京西令曰若不勝敵不可以生時以一擊十不致
之死地不可使勝乃命士卒皆去馬陣于溝壑之間人殊死戰
遼兵大敗追至其營而止明日復敗七百餘人又討興中府宜

州叛人下詔招諭之曰遼之土地皆爲我有彼雖復叛終皆吾民可縱其耕稼毋得侵掠勃董蒙括斜鉢吾搃等獲契丹九斤與中平拜爲南路都統詔曰回鹘保以烏合之衆保據險阻其勢必將自斃若彼不出掠毋庸攻討張覺叛大于宋自錦州往討擊走之逐北至榆關復敗之於營州東北欲乘勝進取南京以方暑雨逐水草休息使僕虺蒙括兩猛安屯潤州戒州縣不得與覺交通九月復破覺將王考古於新安敗其軍于懷峯口惟瓦耳山之戰關毋大敗太宗使宗望來問狀卽將其軍討覺破之太宗乃赦關毋連殺僞都統張敦固遂克南京上遣使迎勞命屯兵鎮守令有司運米五萬石于廣寧給南京潤州戍卒詔以南路歲餽特許田獵奏宋敗盟有狀使副宗望討伐以其屬尊先皇帝任使有功請讓爲都統撒喝副之先鋒渡河圍汴

宋人請盟還與劉彥宗留燕京節制諸軍八月復伐宋克汴州
與撻懶分擊城中諸軍潰而西出者十三萬人大敗之師還擢
元帥左都監攻下河間大破宋兵萬餘於莫州宗輔徇地淄青
又與宗劄分兵破山谷諸屯進克濰州及議伐康王閻母欲先
定河北然後進討太宗酌取其議使引兵取陝西天眷六年正
月辛巳薨年四十熙宗追封吳國王配享太祖廟庭正隆改封
諱王大定徙封魯王諡莊襄 子宗敘本名德壽奇偉有大志
喜談兵天德二年克護衛武義將軍世襲謀克擢御院通進遷
翰林待制兼修注轉國子司業兼左補闕正隆初轉符寶郎雖
除宮職皆帶劍押領宿衛遷大宗正丞母憂起復爲侍衛親軍
馬軍都指揮使改左驍騎契丹撒八反轉咸平尹兼本路兵馬
都總管許以便宜乃出松亭關至廣寧間世宗卽位復遷興中

見於梁魚務授寧昌軍節度使明年二月契丹來攻自將擊之
遇騎千餘漢兵百二十皆散走獨與女直渤海三十騎盡銳力
戰身被二創所乘馬中箭而仆遂爲所執居百餘日盡得賊中
虛實會有臨潢民移刺阿塔等盜馬授之得脫歸見元帥謀衍
平章元宜曰賊衆烏合無紀律破之易爾帥府欲授軍職不肯
受矯取驛馬赴京得召入條陳賊中虛實及謀衍貪吝諸軍進
退不合事機詔大臣議皆然其言進拜兵部尚書領右翼都統
率宗寧烏延查刺烏林荅刺撒兵各千人號三萬佐忠義軍至
花道遇賊與戰會左翼先敗走忠義亦引却獨勒本部遮擊麾
帳下士三百捨馬步戰賊不得逞大軍整列復至合勢擊之賊
遂敗去追至七渡河又大敗之賊平入爲右宣徽使宋兵據海
州將謀深入詔往禦之遷元帥右監軍因駐山東分兵據守要

害敵不得西尋奉詔與左副元帥志寧參議軍事四年入朝奏
暑月在近頓兵邊陲飛輓頗艱上從其請俟秋涼進發還軍面
授成算賜襲衣弓矢九月渡淮引兵出唐鄧至襄陽屢戰皆捷
明年宋人請和軍還除河南路統軍使河決李固渡分流曹單
之間詔與梁肅往視奏言河道填淤不能受水故有決溢之患
今欲復其故道卒難成功幸而可塞他日不免決溢山東非曹
單比也沿河數州驟興大役人心動搖恐宋人乘間扇誘構爲
邊患遂止不塞十年召拜參知政事上諭曩奏黃河利害甚合
朕意朕念百姓差調官吏爲姦率歛星火所費倍蓰委積經年
腐朽不可復用若此等類百孔千瘡百姓何以堪之卿參朝政
宜擇利而行以副朕心及與上諭南邊事對曰南人遣謀來多
得我事情我遣謀人多不得其實蓋彼以厚賞故也十一年奉

詔巡邊六月至軍將戰有疾七月病甚遺表朝政得失及邊防利害薨年四十六上惜其勤勞國家他人不能及傷悼不已輟朝遣敬嗣暉致祭賻銀絹重綵初因宗敘請募貧民戍邊屯田給以廩粟使貧者無艱食之患富家亦免更代之勞上善其言而未行十七年因語宰臣戍邊之卒歲冒寒暑往來番休馬牛往者皆死且奪其農時敗其生業朕甚憫之卿等以何術使百姓安于田里而邊圉彊固往歲參政宗敘嘗爲朕言此事可謂盡心於國今以兩路招討司烏古里石壘部族臨潢泰州等路分置堡戍詳定以聞朕將親覽又聞其子孫家用不給詔賜錢三千貫明昌五年配享世宗廟庭

最幼子吾都補改名昂爲人悖戾嘗從太祖征伐天輔六年與稍喝以兵四千監護都部降人處之嶺東就以兵守臨潢府昂

不能撫御騷動煩擾降人苦之多叛亡者上聞之使出里底戒
諭及過上京諸部已降者復歸遼主惟章愍宮小室韋二部達
內地稍喝駐兵不與討襲時太宗居守詔言違命失衆當與重
法若有所疑則禁錮之俟師還定議其副辭不失勸因國慶可
薄其罰乃杖昂七十拘之泰州而殺稍喝天會六年昂權元帥
左都監十五年爲西京留守天眷三年爲平章政事皇統元年
封漆水郡王二年十一月甲寅薨追封郡王 子鄭家皇統初
以宗室子授定遠大將軍除磁州刺史天德間爲右諫議大夫
累遷會寧益都尹安化軍節度使海陵伐宋爲浙東道副統制
與蘇保衡以舟師自海道趨臨安至松林島阻風泊島間詰旦
舟人望見敵舟請爲備素不曉海路問此去幾何若測以水路
且三百里遂不設備有頃風迅卽至擲以火炮顧見左右舟中

皆火發度不得脫赴水死時年四十一 次子鶴壽本名吾都不累官耶魯瓦羣牧使契丹撤八反使五院部人老和尚率衆來招謝曰吾宗室子受國厚恩寧殺我不能與賊反遂與二子皆被殺

撒离喝名杲安帝六代孫泰州都統婆盧火之族胡盧補山之子雄偉有才略世祖養以爲子太祖愛之常令在軍故不隨遷泰州仍居安出虎水凡宗翰宗望等克汴定河北皆從闕毋攻下河間雄州李成棄城走杲邀擊大破之雄州遂降宗輔經畧山東留杲河上真定賊自稱元帥秦王擊破其衆執而戮之又從宗輔平陝西徇地自渭以西降順德鎮戎軍并涇原路進平熙河明年同奔覲討平河外降寧洮安隴二寨并降下河及樂州至西寧盡降其都護官屬其木波族長等皆迎降復攻慶陽

敗其拒者遂降其城慕洧聞之亦以環州來降得城寨十三步
騎一萬詔書褒美陝西既定留兵屯衝要使總之無何請收劍
外十三州與宋王彥軍七千遇于沙會灤敗之遂克金州連破
吳玠諸軍于饒風關取真符縣及洋州入興元府敗玠兵于固
鎮擒其兩將撒葛杞等盡破宋兵下諸砦及仙人關天會十四
年爲元帥右監軍宗弼復取河南令自河中出陝西既至鳳翔
擊走宋軍時宋軍在京西者甚衆諸將以暑雨欲駐軍且聞宋
兵九萬會于涇州留諸將屯環慶獨引輕騎往取六月敗之于
涇宋兵走渭州拔离速追擊大敗之未幾爲右副元帥皇統三
年封應國公賜資甚厚熙宗出獵賜具裝馬二命射于園中加
開府儀同三司將還軍命宰臣餞之海陵升蒲州爲河中府拜
爲尹入朝進封國王從行官吏皆官賞之因從容言唐建成不

道太宗以義除之卽位之後力行善政後世稱賢陛下以前主失德大義廢絕當如唐太宗則善矣海陵聞其言色變自此忌恨念久握兵在外頗得士心以爲行臺左丞相賜玉帶璽書賜尊以殊禮陰諭右丞相大吳無使果預軍事果尚不知始至勢孤無事輒爭吳詭曰太師梁王以陝西事屬公以河南事屬吳果爭之不得白於朝大臣皆報曰如梁王教帥府令史遙設希意誣果父子并平章宗義尚書謀里野等謀反學果手署并印文詐爲家書與其子御史大夫宗安從左都監奔覲上變有司鞫問不服掠笞楚毒宗安神色不變曰今雖無以自明九泉之下常有冤對吾終不能引屈與宗義謀里野皆被害遂使厮魯渾殺果于汴族其家親屬坐死者二十餘人遷奔覲元帥左監軍開府儀同三司遙設爲博州同知賜錢三百萬大定初詔復

官爵三年追封金源郡王諡莊襄以郡王品秩官爲營葬十七年配享太宗廟庭

世祖曾孫醜漢名衷中都司屬司人祖霸令布里封鄆王父悟烈官至特進大定中衷收兒閭門祇候授代州宣銳軍都指揮使歲旱州委禱雨于五臺靈潭步致其水雨隨降人爲刻石紀之。四遷引進使兼典客署令改尚輦局使扈從北幸賜廐馬二以旌其勤尋爲夏國王李仁孝封冊使歷寧海蠡州刺史平賦役無擾民頃遺愛入爲大睦親府丞除順義軍節度使陞辭賜金幣特寵異之移鎮鎮西泰和六年致仕卒爲人孝悌貞謹深悉本朝婚禮皇族婚嫁每令相之治復有能大安初追贈輔國上將軍

穆宗子撻懶名昌初從宗翰襲遼主遷駕燕樂追都統馬哥不

及收其羣牧獲樞密使得里底及其子磨哥那野以還及太祖
自將襲大魚濛留輜重于草濛使撻懶牙卯守之奚路險阻經
畧爲難兵官渾黜不能安輔其衆命爲奚六路軍帥鎮之時回
鹵保部族來附餘衆奔潰命習古迺婆盧火護送赴燕戒以若
遇險阻卽分兵以行其後撫定奚部及分兩路邊界表請設官
鎮守上依東京渤海列置千戶謀克久之討劾山速古部奚人
因據險來戰殺獲殆盡其速古噶里鐵尼十三巖皆平之又遣
奚馬和尚攻下品達魯古井五院司諸部執其節度乙列詔以
克副所託良用嘉歎建州遙輦昭古牙部族乃遼外戚撻懶
走之獲其妻孥及官豪之家又擒殺隊將曷魯燥白撒葛降民
戶千餘進降金源縣詔贈賜銀牌十又降遙輦二部再破興中
兵降建州官屬得山砦二十村堡五百八十昭古牙勢威亦降

詔第將士功賞撫安新民撻懶請以遙輦九營爲九猛安上以
奪隣有功使領四猛安昭古牙仍爲親管猛安其五猛安都帥
命擇人授之撻懶與劉彥宗舉蕭公翊爲典中尹郡府各以契
丹漢官攝治上皆從之乃以爲六部都統從伐宋已受宋盟還
軍歸中京八月復征與阿里刮攻杞縣破宋兵二萬覆其三營
獲京東路都總管胡直孺及其二子并南路都統制隨師元及
其三將遂克拱州降寧陵破睢陽下亳州宋兵復睢陽又擊走
之擒其將石瑱大軍北還以爲元帥左監軍徇地山東取密州
廸虎取單州撻懶取鉅鹿阿里刮取宗城廸古不取清平臨清
蒙刮取趙州阿里刮徇下瀋滑恩及高唐分遣諸將趣磁信德
進克祁州永寧順安二軍及保州皆降之劉豫以濟南府降命
撻懶監之以鎮撫東平專決大事加右副元帥天會十五年轉

左副都元帥封魯國王張邦昌被誅詔諸將復求可立者乃力舉劉豫及豫廢倡議昇宋以廢齊舊地詔載宗萬傳以久持兵柄謀反有狀詔以劄尊有大功因釋不問出爲行臺左丞相手詔慰遣旣至燕京愈驕肆不法復與翼王勗懷有謀朝議漸悉其與宋交通會復有上變告者方下詔加誅捷懷自燕京南走將入于宋追及于祁州殺之并殺勗懷及宗人活离胡土捷懷二子幹帶烏達補而赦其黨與

烏野諱勗字勉道穆宗第五子生而好學國人呼爲秀才年十六從太祖攻寧江州又從幹离不襲遼主于石鞏鐸太宗嗣位自軍中召還與謀政事粘罕等旣受宋降使就軍中勞之問其所欲惟好書耳乃載數車而還天會六年詔求訪祖宗遺事以備國史命勗與耶律迪越掌之勗等採摭遺言舊事自始祖以

下十帝綜爲三卷。凡部族旣曰某部。復曰某水之某。又曰某鄉某村。以別讖之。其契丹往來及征伐諸部中間詐謀詭計一無所隱。事有詳畧。咸得其實。上書諫太祖臣聞德莫大於樂天。仁莫先於惠下。自與高麗議和。凡女直入高麗者皆索之。至十餘年猶未已然。皆前世姦宄叛亡烏鼯訛謨罕阿海阿合束之緒。當時壯者皆已物故。子孫安於土俗。婚姻膠固。骨肉乖離。誠非衆願。國家民物繁夥。幅負萬里。不知得此果何益耶。高麗稱藩職貢不闕。民亦非外。臣愚謂聖人行義不責小過。宜施惠下之仁。弘樂天之德。聽免徵索。從之。十五年爲尚書左丞。加鎮東軍節度使。同中書門下平章事。預平宗磐之難。賜與甚多。加儀同三司。以皇叔祖字冠其銜。皆力辭不受。皇統元年。孫定熙宗尊號冊文。上名飲於便殿。賜以玉帶。所撰祖宗實錄成三卷。進入。

上焚香立受之賞賚有差詔與平章奕職俸外別給二品親王俸俸益異數也因宴五雲樓進酒稱謝帝起立俄同修國史進拜平章政事光懿皇后忌辰熙宗將出獵勅諫而止後又獵于海島三日之間凡遇五虎親射獲之勅獻東狩射虎賦上悅賜以佩刀玉帶良馬時上日與近臣酣飲或繼以夜因諫稍止進拜左丞相兼侍中八年癸上太祖實錄二十卷賜金銀重綵絹并通犀玉鈎帶出領行臺尙書省事召拜太保領三省事封魯國王爲人剛正寡言海陵方用事朝臣多附之者一日大臣會議海陵後至勗面責之曰吾年五十餘猶不敢後嗣少年強健乃敢如此海陵跪謝九年進拜太師封漢國王海陵篡立加恩大臣以收人望封秦漢國王及宗本無罪誅勗髡鬚頓白因上表請老不許賜以玉帶優詒諭之有大事令宰臣就第商議入

朝不拜因稱疾篤表請愈切以本官致仕進封周宋國王正隆
初與宗室俱遷中都二年例封金源郡王薨年五十九撰定女
直郡望姓氏譜及他文甚衆其諫表甚有典則能以契丹字爲
詩文凡游宴有可言者輒作詩以見意詔鑠板行之 子宗秀
字實甫本名厮里忽涉獵經史通契丹大小字善騎射亦因平
亂除定遠大將軍授以宗磐世襲猛安從宗弼復取河南與海
陵俱赴軍前任使率步騎三千扼宋將岳飛衝要破其軍于毫
宿之間師還爲太原尹改婆速路統軍使高麗遣使以土產獻
却之入爲刑部尚書改御史中丞授翰林學士天德初轉承旨
封宿國公賜玉帶歷平陽尹昭義軍節度使封廣平郡王正隆
二年卒官年四十二例贈金紫光祿大夫

楊宗曾孫掃合名齊父胡八曾寧州刺史齊大定中克屬司將

軍授復州軍事同知在職廉能初復州合廝罕關地方七百餘里因圍獵禁民樵捕齊言其地肥衍令賦民開種則公私有益上然之爲弛禁卽牧民田居收利甚溥因建其地名合廝罕猛安自本朝以來宗室未有爲刑部員外郎者特以授之章宗立改戶部出爲磁州刺史治以寬簡未嘗留獄屬邑武安有道士視觀宇不謹吏民爲請隣郡王師者代主之道士忿奪其利告王私置銅器法當徒獄上齊審其誣時王師有德不忍反坐乃當以准首俱釋其罪磁名郡刺史皆經遴選郡人以前政有聲如劉徽榮程輝高德裕皆所不及河北提刑司以治狀聞明昌三年始議置諸王傳頗難其選乃以齊克王傳王將至任郡猛安迎接齊峻却之王怪問故答曰三國藩輔猛安皆總戎職於王何利焉却之以遠嫌也王悅服會家奴爲不法輒發還本猛

安終更無敢犯者。明年授山東東西路副統軍兼同知益都府事。有惠愛。郡人爲之立碑。轉彰化軍節度使。六年移利涉軍。召見勞慰。擢上京留守。承安二年致仕。卒。爲人明法令。識治體。所至有聲。與丞相承暉並稱。

康宗長子謀良虎名宗雄。始生時。世祖見其風骨非常。他日必爲國器。因解佩刀置其側。俟成人。則使佩之。九歲能射。逸兔十。一射中。奔鹿。世祖坐之膝上。賜以銀器。曰。異日必出倫輩。旣長。風表奇偉。善談辯。多智畧。孝敬謙謹。人愛敬之。復以材武躡捷。挽強射遠。幾三百步。嘗走馬射三疊。已中其二。馬蹶躍而下。步射獲之。又與撻懶逐兔。撻懶已發矢。反顧接之。就射兔中。其輕健如此。康宗喪遼使阿息保來。乘馬至靈帷階下。擇取則贈之。馬太祖怒。欲殺之。因諫而止。及將舉兵。勸太祖遼主驕侈可取。

又不知兵一蕭海里不能擒而我擒之言合上意攻寧江州渤海兵銳甚宗雄以所部敗之論功授世襲謀克出河店之役摧鋒力戰居多達魯古城之戰命將右軍身先士卒遼兵已却復助左軍繞出其後擊之遼衆大潰乘勝逐北日已暮圍之黎明遼兵突圍出追殺至乙呂白石而還上撫其背賜以御服曰朕有此子何事不濟及遼主以七十萬衆至馳門諸將皆曰不宜速戰宗雄曰不然遼兵雖衆將皆庸懦士卒惴惴不足畏也敵之掌握間耳上曰善乃率衆直前短兵接仍令前行持挺擊遼馬首後行者射之大敗遼兵上嘉其功執手勞之賜以御介冑及御戰馬寶貨奴婢斜也攻春州使與宗幹婁室取金山縣行近白麕林獲候者七人縱其一歸縣人聞大軍至奔潰遂下金山復與斜也俱取泰州太祖自將取臨潢府遣爲先鋒遇遼兵

五千與戰大軍隨至大破之留守撻不野降賞以其女旣而與蒲家奴按視泰州地土大宜種植包其土來奏上從之徙萬餘家往屯田西京旣降復叛議者以糧盡欲罷攻宗雄曰西京都會若委而去之不惟降者離心遠之餘黨與夏人且將窺伺矣乃立重賞以激士心旣而夜中有火大如斗墜于城中占曰此城破之象克日賜黃金百兩衣十襲及奴婢等又與宗翰等擊耿守忠兵七千于西京之東四十里大破之迎謁太祖于鴛鴦澤從至歸化州疾篤宗幹問所欲言對曰國家大業旣成主上壽考萬年肅清四方死且無恨遂卒年四十太祖來問疾不及見哭之勸謂羣臣曰此子謀畧過人臨陣勇決少見其比詔合扎千戶駙馬石家奴護喪歸葬於歸化州爲人好學嗜書嘗從上獵誤中流矢拔去神色不變恐上知罪及射者託疾歸家臥

兩月因學契丹大小字盡通之國初立法定制皆與宗幹建白
行焉及與遼議和誓詔契丹漢字復與宗翰希尹主其事天眷
中追封太師齊國公天德二年加秦漢國王正隆例降太傅金
源郡王大定二年追封楚王謚威敏配享太祖廟庭 長子蒲
魯虎襲猛安卒贈金紫光祿大夫孫桓端襲官至金吾衛上將
軍卒子泉頻未襲而死孫蒲帶襲之大定末累官同簽大睦親
府事北京臨潢提刑使朝辭于慶和殿上曰建立官制當寬猛
得中凡軍民事相涉者均平決遣鈐東家人部曲勿使沮擾郡
縣今以司獄隸提刑司惟冀獄行無冤耳既退復遣近臣諭曰
卿等皆妙簡才良付以專責盡心舉職別有旌賞否則有罰
次子阿鄰穎悟辯敏通女直契丹大小字及漢字幼時嘗入宮
熙宗見而奇之曰是兒他日必能宜力圖家年十八授定遠大

將軍順天軍節度使天德二年用廉遷益都尹兼山東東路兵馬都總管歷鎮泰寧定海鎮西安國四軍伐宋爲神勇武平等軍都總管由薛州渡淮與移刺元宜合兵三萬爲先鋒是歲十月至廬州敗宋將王權軍十餘萬于柘皋鎮涓子橋至和州南復與權軍八萬餘會戰又敗之追殺至江上斬首數千級軍還將渡淮舟楫甚少軍士爭渡不得預獲生口知可涉處識以柳枝命本部涉濟既至北岸遇宋人邀擊爭渡者多被殺獨得全軍而返遷兵部尚書監督經畫征窩幹諸軍糧餉授以金牌一銀牌四敗賊還至懿州以疾卒喪至京師上命致祭于永安寺百官赴弔賻銀絹重綵又次按答海一名阿魯綰性端重不輕發有父風年十五太祖賜以一品傘二十餘御毬場分朋擊毬連勝三算宗工舊老咸異之賞賚獨厚天眷二年命襲父猛

安以讓兄子喚端除大宗正丞加武定軍節度使奉朝請改侍
衛親軍都指揮使封金源郡王又進譚王同判大宗正事別授
世襲猛安海陵將還中都諫曰棄祖宗興王之地而他徙非義
也海陵不悅留之上京徙河間以其土瘠隨便遷其族二十五
家于平州久之進封鄆王改魏王除濟南尹地復卑濕改西京
留守正隆例奪王爵除廢寧尹世宗卽位詔至其弟燕京勸拒
弗受言甚指斥按荅海曰此府迫近遼陽勢不能抗卿且受之
從諸郡上謁東京有司議持兩端請併誅之上以按荅海爲弟
所惑若正隆剪刈宗室朕不可效特命釋之獨誅燕京不數日
復判大宗正事再遷太子太保封蘭陵郡王改勸農使給官田
三百頃屋三百間宗州官田百頃進金源郡王致仕大定八年
名見上謂宗室者老如卿者能幾賜錢萬貫甲第一區留京師

使預巡幸毬微宴會十四年薨年六十七臨終戒諸子曰汝輩勿以生富貴中而爲暴戾宜自謙退海陵以猜忌剪滅宗室我惟純謹得免當思效之勿墜吾家

康宗子隈可名猥喝美鬚髯勇健有才畧從太祖伐遼取寧江州戰出河店天眷二年授驃騎上將軍除迭魯苾撒兀詳穩遷累忠順興平軍節度使天德二年入爲大宗正丞四年出爲昭德軍節度使授上京路扎里瓜猛安所屬世襲謀克改德昌軍節度使封廣平郡王正隆例改曷速館節度使再轉忠順軍大定元年封宗國公爲勸農使卒官年六十五初宗幹納宗雄妻海陵術之及篡位使宿直將軍晁震牌印間山往河間囚之與其子婦及孫常春胡里刺胡刺鶻魯等并茶礼之子七人皆殺而焚之樂其骨於濠水大定十七年詔有司收葬

弘簡錄卷二百二十之三 終

弘簡錄卷二百二十三

全明集三

弘簡錄卷二百二十四

明刑部員外郎仁和弘齊邵經邦學

皇清翰林院侍講學士四世孫遠平校閱

載記 金內族四 太祖諸子

宗峻子常勝 宗輔 宗幹子克克襲襲 宗望子齊京文

宗弼子亨 宗傑 宗強子阿鄰可喜 宗敏 宗傳

太祖嫡子宗峻本諱繩果天輔五年命領合札猛安合札猛安者太子之

猛安也受金牌從都統杲取中京遂與俱襲遼主于鴛鴦濶西京

復叛耿守忠引兵五千來救至城東四十里蒲察烏烈谷被先

擊之宗峻與宗翰等繼至敵先據城南浮圖下射士卒多傷宗

峻曰先取是則西京可下攻果克之亟率麾下中衝其陣餘兵

皆下馬從旁交射守忠敗走盡殲其衆遂下西京太祖崩與兄

宗幹卒宗室羣臣立太宗天會二年七月壬午薨後因于合刺以長孫嗣立是爲熙宗追上尊諡曰景宣皇帝廟號徽宗改葬興陵海陵弑立降爲愍王世宗復尊之 次子常勝名元爲北京留守封胙王弟查刺安武軍節度使皇統七年賜燕便殿熙宗酌酒賜元辭不能飲上怒仗劍逼之元逃去命左丞宗憲召元亦與俱去上益怒時戶部尚書宗禮在側使之跪手殺之適河南軍士孫進自稱皇弟按察大王熙宗疑是常勝使特思鞠之無狀時海陵將謀廢立忌胙王有人望不除之將不得立唐括辯復惡特思欲併除之謂熙宗曰孫進反有端不稱他人乃稱皇弟大王特思鞠不以實故出之熙宗以爲然使辯與蕭肄覆按特思自誣服乃殺常勝查刺并特思海陵乘此遂擠阿楞及弟撻撈皆殺之非上本意篡立後追封常勝查刺阿楞官爵

親臨塋所致祭爲人天性賢哲外若愚訥臨事明敏過人與世宗兄弟間尤款密子育本名合住大定二十七年自南京副留守遷大宗正丞兼勸農副使爲人清廉幹治不忝乃父。

次子宗輔初諱訛里朶大定上尊諡追改宗堯生而魁偉尊嚴望者畏懼性復寬恕好施惠尚誠實常居帷幄與諸子皆總戎旅天輔六年太祖親征太宗居守黃龍府安福哥誘新降之民以叛宗輔與烏古迺討平之南路軍帥鶻實答以賊敗詔往闕實咸稱平允天會五年代宗望爲右副元帥駐兵燕京分遣諸將徇地淄青發自河間至樂安破宋馬括兵二十萬明年二月移刺古破宋臺宗雋宋忠軍五萬于大名獲之冀州人乘夜出兵襲照里營擊敗之宋主奉表請和密以書誘契丹漢人詔伐宋令發河北攻克大名取東平及徐州降劉豫於濟南襲宋主

于揚州語在宗翰傳中時安室經畧陝西所下城邑叛服不常其監戰阿盧補請益兵帥府會諸將議曰陝西五路兵力雄勁非不足用而綏懷之道有所未盡誠得位望隆重恩威兼濟如皇子者以往可指日而定詔乃使宗輔以右副元帥總陝西征伐諭令戮力自愛時宋張浚兵取陝西宗輔至洛水泊兵與浚戰于富平自日中至于昏暮凡六合戰破之耀州鳳翔府皆來降遂下涇渭二州敗宋經畧使劉侃軍于瓦亭涇原路統制張中孚知鎮戎軍李彥琦咸以城降招討都監馬五擊走宋秦鳳路都統制吳玠軍于隴州宗輔進兵降甘泉等三堡取保川城破宋熙河路副總管軍三萬獲馬千餘拔安西等二寨分遣都統阿盧補宗弼招撫城邑之未下者凡得鞏洮河樂西寧蘭廓積石等州定遠和政甘喀卓洮安隴等城寨及鎮堡蕃漢營部

四十餘所并涇原熙河皆平遂班師與宗翰俱朝京師授立熙宗爲諸班勃極烈宗輔爲左副元帥十三年五月甲申行次媯州薨年四十陪塋睿陵追封潞王諡襄穆皇統六年進冀國王正隆二年追贈太師上柱國改封許王世宗卽位追上尊諡立德顯仁啓聖廣運文武簡肅皇帝廟號睿宗二年改塋于大房山號景陵

庶長子宗幹本名幹本伐遼至其界使率衆先往填塹士卒畢度遇渤海軍馳突而前左翼七謀克少却遂犯中軍太祖戒杲遇大敵不可易使宗幹馳出控止導騎皆堙之馬杲乃還從戰達魯古城以中軍爲疑兵及攻下黃龍府太祖卽欲取春州宗幹勸以休息士卒遂班師旣而得降人言泰州無備可取復令斜也取之又下金山縣宗雄屬以兵三千招集未降諸部宗幹

擇士人材幹者以詔書諭之遂降女固脾室四部及渤海人太祖以暑月克臨潢府深入敵境至沃黑河諫以士罷馬乏糧餽不繼恐有後艱復從之宗翰嘗再使諭都統杲移賚勃極烈灼見事機彼已發兵不可中止請從其策當時無宗幹言杲終無進兵意既會軍于羊城溲使宗幹以精兵六千襲遼至五院司復敗耿守忠兵語在前傳太宗卽位拜爲國論勃極烈與斜也同輔政天會三年旣獲遼主啓太宗始議禮制度正官名定服色典庠序設選舉治曆明時熙宗卽位以有保傅之力拜太傅領三省事天眷二年進太師封梁宋國王監修國史入朝不拜賜以杖令策上殿復有足疾詔設坐奏事詔議南伐率羣臣奏構蒙再造之恩不思報德妄自踴張所求無厭今若不取後恐難圖上曰彼將謂我不能奄有河南之地遂詔中外復河南疆

土皇統元年賜車輿上殿制詔不名從上幸燕京有疾駕親臨
問自燕京還至野狐嶺因疾亟不行復臨問語及軍國事上悲
泣不已明日再同后往視后親饋食至暮而還爲赦罪囚以饗
五月己酉薨輟朝七日其制始此日官奏戊亥不宜哭上曰君
臣之義骨肉之親豈可避之因哭之慟生日亦不舉樂喪至上
京幸其第視殯事畢日仍臨視之次子海陵墓立追諡憲古弘
道文昭武烈章孝睿明皇帝廟號德宗以故第爲興聖宮大定
二年除去廟號改諡明肅皇帝及海陵廢追削明肅帝號封爲
皇伯太師遼王諡忠烈妻子諸孫皆從降例明昌四年配享太
祖廟庭餘子充充褒袞 充本名神土愍熙宗初加光祿大夫
天眷間留守汴京皇統中封淄國公爲吏部尚書進封代王遷
同判大宗正事九年正月戊戌拜右丞相壬寅轉左丞相薨追

封鄭王大定二十二年降儀同三司左丞相長子檀奴爲歸德軍節度使幼子阿里白定遠大將軍和魯忽土猛安忽隣河謀克俱爲海陵所殺世宗贈檀奴榮祿大夫阿里白輔國上將軍詔有司改葬仲子元奴名永元字惇禮幼聰敏口誦千言善左氏春秋通其大義皇統元年試宗室子作詩中格天德初授百女山世襲謀克與弟耶補兒逃歸遼陽世宗卽位授永元世襲猛安爲宗正丞改符寶郎灤州刺史耶補兒襲其謀克轉棧州防禦使時張弘信通檢山東督責苛急專以多得民間物力爲功永元面責之曰朝廷立法本以差調不均今反妄加殘酷箠擊農民有至死者達官子孫使與商賈同處上役豈立法不意哉弘信無以對自是棧州賦稅得以實自占累遷泰寧震武軍節度使大定六年母憂起復改崇義軍又徙順義軍歷興大

蒲多知民間利害所至稱治朔州西境多盜而滑吏大姓又竄獄訟亂賦役至乃剔其宿姦百姓安之政迹尤著其民並爲立祠會與濟州防禦使幹論坐孳畜小過俱解職頃之起爲保大軍節度使歷昭義絳陽震武三軍遷濟南尹北京副留守改興中尹終彰德軍節度使年五十一遣使致祭賻銀絹雜綵充本名梧桐皇統七年由左副點檢轉都點檢九年爲會寧牧改左宣徽使使宋還值海陵篡立拜司徒兼都元帥領三省事進太尉盡賜以太祖妃蕭氏財產羅都元帥府立樞密院卽命爲使天德四年十二月晦薨元旦輟朝不受賀進封克王大定例降特進子阿合大定中爲符寶祗候至定武軍節度同知襄本名永慶海陵母弟爲輔國上將軍卒天德二年追封衛王再贈司徒大定例降銀青光祿大夫子和尚封應國公賜名樂善

大定間家奴小僧月一妄言和尚寢有異徵襄妃僧酷以爲信然召日者李端卜之云當爲天子司天張友直亦云當大貴別奴李添壽上變下僧酷和尚于獄驗問有狀皆伏誅世宗傷閔者久之 袞本名蒲甲桀驁強悍初爲輔國上將軍天德初加特進封王爲吏部尚書判大宗正事坐語禁中起居狀與承旨定秀護衛麻吉小底主之章皆決杖有差未幾投猛安及還中都道中以爲西京留守與西京兵馬完顏謨盧瓦往來有舊嘗遣以玉帶稱其驍勇不減尉遲敬德編修官圓福奴之妻與蒲家姻戚嘗戒大王名太彰者宜少謙晦家奴喝里知海陵疑之乃上變言與謨盧瓦等謀反嘗召日者詢問命御史大夫高禎刑部侍郎耶律慎須呂就西京鞠之無狀海陵怒使人往械至中都不復究問斬之于市餘皆處死

第二子宗望本名幹離不每從征伐常在左右與都統杲出青嶺遇遼兵三百餘掠降人家貲悉生致之審得遼主所在虛實獨與馬和尚馳擊大敗而走生擒五人主尚在鴛鴦濼未去進兵追之主走陰山弟普王捏里自立新定雲中諸州人心不固奉杲命與十餘騎跋涉兵寇經數千里請上臨軍諭以懸軍遠伐豈能盡合機宜。朕卽啓行既次大濼西南杲使希尹奉請徙西南招討司諸部人于內地上問當出何路宗望對曰中京殘敵芻糧不給由上京臨潢府爲宜然新降之人遠爾騷動未降者必皆疑懼勞師害人所失多矣上廼下其議命軍帥度宜行之上聞遼主在大魚濼自將精兵萬人襲之晝夜兼行及石砦鐸馬多困乏軍士至者纔千人遼軍尚二萬五千方治營壘先鋒昱與余睹議我軍未集人馬疲劇未可以戰宗望爭曰今追

及遼主而不亟戰日入而遯則無及矣兩軍遂戰短兵接遼人
圍者數重士皆殊死鬪主度吾兵少與嬪御方自高阜下臨平
地觀看余睹指示諸將此遼主庵蓋若萃而薄之可以得志騎
兵馳赴之主果望見大驚遯去之間遼兵大潰宗望等還燕京
已定命佐幹魯爲副都統襲主陰山將至青塚衆遇泥濘不能
進獨與當海四騎以繩繫遼都統林牙大石使爲鄉導直至其
營主時已往應州諸嬪御驚駭爭欲出奔命騎下執之有頃後
軍至降遼太叔胡盧瓦妃捏里次妃遼漢夫人并其子秦許二
王女骨欲餘里衍幹里衍大與野次與野趙王妃幹里衍招討
廸六詳穩心斥節度使孛迭赤狗兒得車萬餘乘惟寧王雅里
及其長女乘軍亂亡去進至掃里門爲書以招遼主方自金城
來知其族屬皆見俘執率兵五千餘決戰宗望所引千兵擊敗

之相去僅百步復遞去獲其子趙王習泥烈及傳國璽上于行
在太祖喜錄諸帥功加以厚賞獻俘賜以遼蜀國公主餘里衍
遼主使謀盧瓦持兔鈕金印請降宗望受之視其文乃元帥燕
國王之印復遣書招諭以石晉北遷事又遣使諭夏國曲示和
好以沮其救遼之心進兵趨天德獲遼耶律慎思候人吳十回
言夏國迎護遼主渡河傳檄諭之果欲附我當執送遼主若猶
疑貳恐有後悔無何使問關丹敗狀就以其軍討覺降瀕海郡
縣與戰南京城東覺敗奔入于宋城中人執其父及二子來獻
宗望殺之賞有功將士各有差移書責宋納叛且徵軍糧請空
名宣頭增信牌安撫新降之民詔以新附長吏職員仍舊命諸
路轉輸軍糧勿督於宋給以銀牌其遷潤來隰四州人徙于瀋
州者俟畢農各復其業方遣使以詔書宣諭張敦固等出降使

者與俱入城收兵城中人復殺之立敦固爲都統劫府庫掠居民乘城拒守引兵八千分四隊出戰又大敗敦固等以屢嘗拒戰不敢遽降再三開諭許其望闕通拜乃開一門遣閻母入奏下詔赦南京官民罪無大小皆釋之官職如舊別勅有司輕徭賦勸稼穡聞北歲不登若如舊徵歛恐民匱乏乃度其糧數賦之射糧軍願爲民者使復田里時遷濶來隰之民尚保山砦亦從其請特選良吏招撫俄召赴闕宋兵三千自海道來破九寨殺馬城縣戍將節度使度盧幹取其銀牌兵仗及馬而去又聞童貫郭藥師治軍燕山乃首建伐宋之策奏曰若不伐宋必爲後患上意決以監開母劉彥宗兩軍自燕山路進至三河破藥師兵四萬五千遂取燕山府盡收其軍寶馬萬匹甲冑五萬兵七萬州縣悉平宋中山戍將王彥劉璧率部下二千來降次邯

師宋李邦請修舊好留之軍中不遣自藥師降益知宋之虛實請以爲燕京留守及董才降益知宋之地里請任以軍事太宗俱從之賜以國姓咸給金牌四年諸軍由滑州渡河圍汴宋沈晦以誓書三鎮地圖至軍中歲幣割地一依定約遂與宋平退軍孟陽候騎覺姚平仲兵來襲分遣諸將迎擊大破之復進攻城問舉兵之狀少帝大恐使宇文虛中辨說初不知其事且將加罪其人乃輟弗攻師還河北兩鎮不下分兵進討罷常勝軍給還燕人田業命將士分屯安肅雄霸廣信之境已還山西拜右副元帥有功將士遷賞有差八月詔復伐宋會諸將發自保州耶律鐸破宋兵三萬于雄州殺萬餘人耶野等敗宋軍七千於中山高六董才又破宋兵三千於廣信降其軍及旁近縣鎮宋种師閔軍四萬駐井陘宗望大破之遂取天成軍東還克真

定殺知府李邈得戶三萬降其五縣自真定趨汴十一月戊辰宗望至河上降魏縣諸軍渡河留諸將分出大名之境臨河大名諸縣并德清軍開德府皆克之阿里剗以騎兵三千取胙城先趨汴破宋軍六千于路抵城覆宋兵千人擒其數將因分遣諸將遇宋援兵閏月壬辰朔宋兵一萬自汴州出戰選勁勇五千使當海忽魯維鵬失擊敗之自克汴與勞賜並與宗翰傳同大軍北還分諸將鎮守河北宗望乃西上涼陘是月堯天會十三年封魏王皇統三年進許晉國王天德二年加贈太師遼燕國王配享太宗廟廷正隆例降大定三年改封宋王諡桓肅子齊京文 齊本名受速長身美髯天眷三年授鎮國上將軍皇統初遷光祿大夫正隆六年加銀青榮祿大夫大定初授特進安武軍節度使本以近屬上所寵遇而性庸滯無才能三年罷

除占問嫁娶修造葬事不得推算相命違坐徒從重

第四子宗弼本名幹輿金語作兀术同兄宗望在軍嘗率百騎馳驟越盧亨古野里斯等敗之矢盡奪遼兵士槍獨殺八人仍同襲取遼主于鶻鶻濛從伐宋取湯陰縣降其卒三千至御河橋已焚不得渡合魯索以七十騎涉水而過殺宋焚橋軍五百宗弼引三千騎竟薄汴城宋上皇出奔選百騎追之弗及獲馬三千匹而還復從宗輔徇地淄青敗宋鄭宗孟數萬衆遂克青州復破賊將趙成并黃瓊軍取臨朐軍還遇敵三萬于河上擊敗之殺萬餘人追宋康王初攻開德府糧乏轉攻濮州前鋒烏林答泰欲破王善二十萬衆克其城降旁近五縣復攻開德先登奮擊破之攻大名軍復先登河北平宋主自楊州奔江南分道伐之進攻歸德城中兵自西北二門出爲當海所敗方絕陞

策道列檄治具因懼遂降又攻下睢陽至齊春宋安撫使馬世元率官屬出迎進下廬州再降巢縣時鄭瓊萬餘衆守和州當海等復破之遂渡江將至江寧西二十里宋杜充率步騎六萬來拒戰鵬盧補當海廸虎大臭合擊破之宋陳邦光以江寧府降留長安奴幹里也守江寧使阿魯補幹里也別將兵徇地下太平濠州句容溧陽等縣沂江而西屢敗張永等兵充遂降宗弼取廣德軍路追襲宋主取湖州遂至餘杭官守巨室皆逃去攻克杭州留城中宋主走入于海分麾下兵會攻明州克之而自引兵取秀與平江韓世忠以舟師扼江口我軍舟小并丹漢軍沒者二百餘人遂自鎮江沂流西上世忠來襲奪其大舟十艘循南岸且戰且行世忠循北岸艤艫大艦連絡數倍宗弼軍前後擊柝自夜達旦世忠挑戰不絕一日數接將至黃天蕩因

老鰲河故道一日夜開三十里遁秦淮宗弼乃得至江寧捷懶
使移刺古自天長來援泰欲亦以兵來會連敗宋兵將渡江而
北宗弼單渡自東移刺古渡自西與宋兵戰江口世忠分舟師
絕江上下舟皆張五綳因選善射者乘輕舟射以火箭五綳皆
自焚煙燄滿江世忠不能單追北七十里僅能自免舟軍殲焉
還從宗輔定陝西與張浚遇于富平宗弼陷重圍中韓常流矢
中目怒而拔去其血淋漓塞之以土宗弼躍馬奮呼俱出搏戰
遂敗浚軍又與阿盧補招降熙河涇原兩路及攻吳玠于和尚
原抵險不可進方退軍遇伏且戰且走行三十里將至平地宋
軍陣于山口宗弼大敗將士多沒明年復攻和尚原克之天會
十五年爲右副元帥封瀋王天眷二年自軍中入朝拜都元帥
進封越國王察知捷懶與宋人交通路道詔往燕京誅之卽領

行臺尚書省事治民訟錢穀兼總帥府決諸州郡軍旅之事既久任方面深究利害請卽舉兵復河南疆土詔由黎陽趨汴遣孔彥舟下汴鄭兩州王伯龍取陳州李成取洛陽自率衆取亳州及順昌府嵩汝等州相次皆下因天暑還軍于汴三年河南平上遣使勞問加太保有功將士三千並授忠承校尉又攻克嵐石保德九月壬寅來朝見上于燕京起立酌酒飲之賜以甲冑弓矢良馬二匹庚申還軍皇統元年進伐淮南克廬州復朝燕京詔與宰相同入奏事拜左丞相兼侍中監脩國史詔以燕京路隸尚書省西京及山後諸郡族隸元帥府七月己酉還軍渡淮以書責讓宋人答書乞加寬宥有令遣信臣來稟議宋主乞先歛兵許敝邑拜表闕下上遣護衛將軍撒改往勞之宋遣曹勛來上習書畫淮爲界仍進歲幣進拜宗弼太傅表乞致仕優

詔不許賜以金券皇統三年爲太師領三省事自宗翰死宗幹宗偉捷愷湛溺富貴人人有自爲之心宗幹獨立無如奈何時無宗弼國勢危殆屢矣八年十月辛酉亮世宗嘗言宗翰之後惟宗弼一人非虛言也大定十五年諡忠烈十八年配享太宗廟庭 子學選名亨熙宗時封芮主爲猛安加銀青光祿大夫海陵篡立加特進素號材武勇直絕人以爲右衛將軍將謁太廟密諭之曰朕疑太宗諸子太强得卿衛左右可無慮耳賜以良弓辭曰弱不可用海陵遂忌之出爲其定尹歷中與東京留守家奴梁遜誣告與衛士符公弼謀反考驗無狀坐誅海陵益疑之改除廣寧尹使李老僧伺察動靜至廣寧待老僧甚厚常因蒲博多遺財物不忍致亨死罪遲疑者久之海陵再使小底訛論促老僧會渤海大族六斤坐累爲奴頗慧黠因與侍妾

私通懼亨聞知密誣欲因間刺海陵老僧捕繫以聞遣工部尚書耶律安禮大理正忒里等鞠之復無驗海陵怒竟遣老僧夜至囚所殺之正隆六年復殺妃徒單氏次妃大氏及子羊蹄等三人大定中追復官爵封韓王并妻子詔有司改葬

宗傑本名沒里野天會五年薨十三年謚孝悼天眷元年追封越王以其長子與爲會寧牧封節王後歷上燕西三京留守皇統三年薨海陵將謀弑立構其子阿楞撻楞并宗傑妻皆殺之大定間贈宗傑太師進封趙王

宗強本名阿魯天眷元年定封國制初封紀王三年代宗固爲燕京留守改封衛王至太師皇統二年十月甲午薨輟朝七日喪至上京上親臨哭之慟仍親視喪事子阿鄰名爽天德三年受世襲猛安正隆二年除橫海軍節度使改安武軍留守奉朝

青海陵將伐宋嚴酒禁爽坐與徒單貞會飲下遷歸化州刺史
忝猛安未幾復其官海陵渡淮分遣使者剪滅宗室爽憂懼不
知所出會世宗卽位爽弟阿瑄遣人來報卽棄妻子奔迎至梁
魚務入見世宗大悅除殿前馬步軍都指揮使封溫王改秘書
監母憂起復遷太子太保進封壽王賜宴神龍殿語以朕賴卿
兄弟之福安享快樂在正隆時朝夕常懼不保爽泣下頓首未
幾判大宗正事有疾特遷其子符寶祗候思列爲忠順軍節度
副使時年尚少未開政事入謝諭以朕意冀卿因喜而愈自今
訓以義方使有善可稱別加陞擢疾少間將從上如涼陘賜錢
千萬進封英王累太子太傅升太師復世襲猛安加封榮王二
十三年薨上悼痛輟朝遣官致祭賜銀絹重綵陪塋山陵親王
百官送塋弟可喜累官唐括部族節度使降忻州刺史畏避
弘簡錄

海陵棄州來歸迎見世宗于麻吉鋪除兵部尚書素負才勇過人自以太祖孫頗有興志世宗初至中都倥偬多事扈從諸軍未暇行賞咸出怨言有幹論者正隆末爲昭武大將軍監完顏殺英軍于歸化道遇獨吉和尚持大定赦文至彰德使人招之幹論不聽率兵來拒和尚亦列所將蒲華兵列陣待之會幹論兵皆不肯戰遂請降和尚邀入相州收其甲兵置酒相勞幹論北腹疾不肯飲至夜與其腹心密謀欲執和尚爲所覺不得發與河南統軍司令史幹里朵俱謁世宗亦撫慰之幹論自憊初無降志幹里朵爲人狡險咸不自安欲因扈從軍士怨望作亂往約押軍猛安沃窟刺從之大定二年上謁山陵可喜中道稱疾而歸乙亥夜召李惟忠完顏瑋并布輝同會其家沃窟刺以兵赴之瑋曰今不得高松軍事不成遂與可喜布輝共擒幹論

惟忠幹里朶沃窟刺請官自首下獄皆伏誅可喜不肯自言其
始謀及與幹論面質然後歛伏上念兄弟少太祖孫惟數人在
側然傷之詔罪止可喜一身其兄弟子孫皆不緣坐 阿瑄長
身多力天德二年累授奉國金吾衛上將軍居於中都世宗卽
位與瑄殺留守沙離只自行留守事語見瑄傳大定二年授橫
海軍節度使賜以名鷹時方年少詔以卿有才力宜自戒慎留
心政事改武定軍母憂起復轉興平軍賜以襲衣廐馬遷廣寧
尹坐賊犯法當死以親親故曲爲全貸杖削解職頃之起爲平
涼并濟南尹入見常武殿上申諭戒以自今戒懼勿復使惡聲
達于朕聽未幾卒于官年二十七命有司致祭賻銀絹重緜
宗赦本名阿魯補天眷元年封那王皇統三年爲東京留守拜
左副元帥兼會寧牧進都元帥兼判大宗正事加太保領三省

事尋領行臺尚書省事封曹國王屢憂熙宗性喜殘殺乘左右
無人密語海陵國家事重奈何輒殺大臣海陵將以爲指斥自
念無證不可發及弑熙宗畏其屬尊且材勇欲構誣以除之時
世宗爲葛王使召之宗敏疑懼不敢往王曰叔父今不卽往至
明日如何相見不得已入宮海陵尚猶豫以問烏帶答曰彼太
祖子不殺之必有異議乃使僕散忽土刃擊宗敏左右走避膚
髮狼藉血肉遍地葛王見之問於衆曰國王何罪而死烏帶曰
天許大事尚已行之此蟻豈爾何足道者天德三年追封太師
進封爵妃蒲察氏進國號封子撒合輩舒國公賜名褒進封王
阿里罕封密國公正隆六年見殺大定間詔復官爵

宗雋本名訛魯觀爲東京留守時劉豫已廢撻懶自河南入朝
倡議以廢齊故地界宋熙宗命羣臣議皆曰不可獨宗雋與相

合謂我娶地與宋必然德我宗幹等爭之不能得宗憲復折之
曰我俘宋父兄子弟怨匪一日若復資以土地是助讐以戕我
何德之有不聽捷懶弟勗亦謂不可既退責以他人尚有從者
汝乃興議乎坊曰苟利國家豈敢私耶天眷元年拜宗傳左丞
相開府儀同三司兼侍中封陳王二年加太保進封充國王領
三省事時宗磐位首相竟以河南陝西地與宋後坐交結朋黨
伏誅

冊曰金國獻典實資內族五人夾輔欽郡三相秉軸宗幹
宗徽睿德顯四君誕育而今而後梟鴟魚肉

弘簡錄卷二百二十四終